



déi, déi wëlle méi héich kontribuéieren, kënnen da méi héich kontribuéieren.

Wa Projekte sinn, déi net méiglech sinn ze maachen, wann d'Kontributionen net gehéicht ginn, dann hunn ech kee Problem, fir och meng politesch Responsabilitéit bei lech sichen ze kommen, fir ze kucken, ob mer dat solle maachen oder net. Mä, wéi gesot, fir elo einfach ze soen, mir héijen, ouni ze wësse firwat, do gesinn ech och net eng Ursach derfir.

An ech géif mech och freeën, wa mer hei eng Majoritéit, eng grouss Majoritéit op jidde Fall, Här President, fir dee Projet hätten.

► **M. le Président.** - Merci dem Här Statsminister. A mir géifen dann och direkt zum...

(Interruption)

Jo? Parole après ministre?

► **M. Justin Turpel (déi Lénk).** - Jo.

Ech hunn d'Fro gestallt vum Vote, vun der Majoritéit qualifizéiert. An déi aner Fro, déi ech dem Statsminister gestallt hat, war déi, ob mer net sollen - scho beim Projet virdrun an och elo hei nach eng Kéier -, ob et net méi Sënn géif maachen, mir géifen am Virfeld iwwer esou Saachen, iwwer esou Themaen diskutéieren. D'Regierung, déi huet de Kalenner vun deem, wat usteet. Et wier da gutt, wann d'Regierung eis géif zur Zäit informéieren.

An deem Zesummenhang stellt sech och d'Fro, ob et net méi korrekt wier, d'Vertrieder vun der Regierung géife mat engem Mandat op esou Sitzunge goen, déi awer nëmmen all véier Joer stattfannen a wichteg Décisiounen huelen. Ech wollt awer do nach eng Kéier nohaken, fir do zu deenen zwou Saache Prezisiounen ze kréien.

Merci.

► **M. Xavier Bettel, Ministre des Communications et des Médias.** - Här President.

► **M. le Président.** - Här Statsminister.

► **M. Xavier Bettel, Ministre des Communications et des Médias.** - Parole après député dann.

Ech wollt just hei ënnersträichen, dass déi Konferenz dräi Woche gedauert huet. An do ass och eng Dynamik an enger Konferenz. A wa mir au préalable an all Konferenz, international Konferenz, wou mer ginn, musse soen, mir kënnen näischt decidéieren, well mer net wëssen, wat eis Chamber doriwwer seet! Hei si jo Dispositionen, wou mer der Meinung sinn, dass se am Intérêt vun der Saach sinn.

An zu Lëtzebuerg war nach ni e Mandat préalable gefrot ginn, ob dat elo fir en Europäesche Conseil ass, ob dat fir Dispositionen um europäeschen Niveau oder bei internationale Gremien ass. Wann dat eng nei Fuerderung vun der Majoritéit sollt sinn, soll een dat maachen. Mä ech mengen, dass dës Dispositione kompatibel sinn zu där Politik, déi mer och eis engagéiert hunn, fir déi nächst véier an en halleft Joer mindestens nach ze maachen.

► **M. le Président.** - Merci dem Här Statsminister. Mir géifen dann zur Ofstëmmung iwwert de Projet 6640 iwwergoen.

Vote sur l'ensemble du projet de loi 6640 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. D'Procuratiounen. De Vote ass ofgeschloss.

59 Deputéiert hunn um Vote deelgeholl, 57-mol Jo, 2 Abstentionen, wou ech dovun ausginn, dass déi motivéiert sinn. De Projet ass domat ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Luc Frieden (par Mme Nancy Arendt), Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Jean-Claude Juncker (par Mme Diane Adehm), Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spatz, Serge Wilmes et Michel Wolter;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur (par M. André Bauler), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens et Mme Lydie Polfer;

MM. Claude Adam, Henri Kox, Mmes Josée Lorsché, Viviane Loschetter, M. Roberto Traversini et Mme Christiane Wickler;

MM. Gast Gibéryen, Fernand Kartheiser et Roy Reding (par M. Fernand Kartheiser).

Se sont abstenus: MM. Justin Turpel et Serge Urbany.

Ass d'Chamber d'accord, fir d'Dispens vum zweete verfassungsméissege Vote ze ginn?

(Assentiment)

Dat ass dann esou decidéiert. Merci.

Dee leschte Projet vun eise Ordre du jour ass de Projet de loi 6420 iwwert de Fonds National de la Recherche. D'Riedezäit ass nom Modell 1 festgeluecht. De Rapporteur, den Här Bauler, steet scho prett.

Den Här André Bauler huet d'Wuert, fir de Projet ze presentéieren.

12. 6420 - Projet de loi

- modifiant la loi modifiée du 31 mai 1999 portant création d'un Fonds National de la Recherche dans le secteur public;

- modifiant la loi modifiée du 12 août 2003 portant création de l'Université du Luxembourg

Rapport de la Commission de l'Enseignement supérieur, de la Recherche, des Médias, des Communications et de l'Espace

► **M. André Bauler (DP), rapporteur.** - Merci, Här President. Dir Dammen an Dir Hären, nieft dem Pisa-Wëssensmagazin, deen elo scho fënnel Joer op der Tëlee leeft an deen een net méi spéit wéi de leschte Sonndeg fir déi 85. Kéier kucke konnt, gehéieren de Science Festival oder och nach d'Chercheurs à l'école zu deenen Initiativen, déi de Fonds National de la Recherche an d'Liewe geruff huet a finanziell ënnerstëtzt, fir d'Effentlechkeet fir méi Fuerschung hei zu Lëtzebuerg ze sensibiliséieren.

Den FNR huet sech an de leschte 15 Joer zu engem wichtege Partner entwéckelt, wann et drëm geet, d'Kultur vun der Wëssenschaft ze promovéieren. Och de Science Festival ass eng eemoleg Geleeënheet, fir den Dialog tëscht der Wëssenschaft an der Gesellschaft ze férdere. Den FNR ënnerstëtzt d'Promotion vun der Kultur, der wëssenschaftlecher Kultur. Dat ass extrem wichteg, fir bei eiser Jugend den Appetit an den Intérêt un de Wëssenschaften ze erwächen a waakreg ze halen.

Här President, Dir Dammen an Dir Hären, ier ech méi genee op de Gesetzesprojet u sech aginn, erluben ech mer, desen Text a méi e generelle Kontext ze stellen. Am 21. Jorhonnert hânt de Räichtum vum Land méi wéi jee vum Wësse vu senger Bierger of. Eise Wuelfstand wäert ëmmer méi op wëssenschaftlech Entwécklungen an op déi technologesch Uwendungen vun deem neie Wëssen opgebaut sinn. Dofir ass et essenziell, datt mir als Land a Fuerschung, Entwécklung an an d'Innovation investéieren, fir eis Zukunft ofzeséieren.

D'Fuerschung, a besonnesch déi effentlech Fuerschung, déi jo iwwert den FNR ënnerstëtzt gëtt, soll sech virun allem mat de wichtege Erausforderunge vun eiser Zäit beschäftegen. An de leschte Joren huet sech kloer gewisen, datt déi Länner, déi eng zolidd Fuerschungsbasis hunn, d'Kris besser bewältege konnte wéi Länner, déi net esou staark an d'Fuerschung investéiert haten. Eis Fuerschungslandschaft gouf an de leschte Joren diversifizéiert. Stat an FNR hunn dozou hire respektive Bäitrag gelescht.

Et gouf och néideg, eise Fuerschungssystem ënnert d'Lupp ze huelen a kritesch ze belichten. Mëtt des leschte Jorzéngts ass desen Exercice an d'Wee geleet ginn. 2005 huet déi deemoleg Regierung der OECD dofir eng Analys an Evaluatioun vun eise nationale Fuerschungs-, Innovations- an Entwécklungsdispositif uvertraut. Och d'Stärkten an d'Schwächte vum effentleche Recherches-System goufen analyséiert.

De Fonctionnement vum FNR gouf 2010 bewäert. Op Basis vun all deenen Evaluatiounen gouf festgehale, fir déi gesetzlech Ännerunge virzehuelen, déi sech onweigerlech opdrängen. De Gesetzesprojet, dee mir haut guttheesche sollen, huet als Zil, dat modifizéiert Gesetz vum 31. Mee 1999, dat den FNR am effentleche Secteur geschafen huet, an dat modifizéiert Gesetz vum 12. August 2003, dat d'Uni Lëtzebuerg an d'Liewe geruff huet, ze adaptéieren.

Ech wëll nach eemol drun erënneren, datt den FNR geschafe gouf, fir de Fuerschungsaktivitéiten am effentleche Secteur eng zousätzlech Impulsioun ze ginn, dës mat enger duebeler Missioun. Engersäits goung et mam FNR-Gesetz drëm, fir Gelder ze sammelen, ze verwalten an anzusetzen, déi aus effentlechen a private Quelle kommen, fir um nationale Plang d'Recherche an déi technologesch Ent-

wécklung am effentleche Secteur ze ënnerstëtzen. Anerersäits ass et drës gaangen, e permanente Reflexiounsprozess ze féieren, mat Hëllef vun deem déi national Fuerschungspolitik opgrond vu wirtschaftlechen Donnéeën kann orientéiert ginn.

Den FNR gëtt aus dem Statsbudget finanziert, mä an de leschte Joren huet den FNR et ëmmer nees fäerdegbruecht, Drëttmëttel aus den europäesche Fuerschungsprogrammer ze kréien, dës an der Héicht vun 3% bis 5% vu senger Reetten. Ëm 4% vun den Dépense ginn zurzäit an d'Personalkäschten, 2% an d'Promotioun vun der Fuerschung an ëm déi 90% fléissen a Projeten, déi zesumme mat der Uni, de CRPen, dem CEPS, dem Statoc, dem CHL, dem Naturhistorische Musée an dem Statslabo souwéi anere Partner ëmgesat solle ginn.

Den FNR ënnerstëtzt d'Recherche am effentleche Secteur mat engem diversifizéierte Portfeuille vun Instrumenter, denke mer un thematesch a strukturell Fuerschungsprogrammer, Begleedungsmoosnamen oder Hëllef fir Formation-Recherche. D'Entwécklungen an der Fuerschung an an der Innovatioun am leschte Jorzéngt hu kloer gewisen, datt den FNR op legalem Plang ugepasst muss ginn. Heibäi geet et och drëm, d'Recommandatiounen vun der OECD a vum Cabinet d'experts zumindest deelweis ëmzesetzen.

Här President, Dir Dammen an Dir Hären, de Gesetzesprojet 6420 gouf den 3. Abrëll 2012 duerch den deemolegen Héichschoulminister François Biltgen déposéiert an nieft dem Statsrot vun der Salariats-, der Handels- an der Statsbeamtekummer aviséiert. Fir den Detail vun de legislativen Aarbechten erluben ech mer, op de schrëftleche Rapport ze verweisen.

D'Gesetzesmodifikatiounen situéiere sech op sechs Niveauen. Ech wëll se hei kuerz résuméieren.

Éischtens: D'Missioun vum FNR ginn à jour gesat. De Gesetzesprojet klarifizéiert d'Aufgabe vum FNR, andeems en d'Natur an d'Ziler vum Fong senger Aktioun prezisiéiert an andeems en d'Roll vum FNR als Haaptinstrument an als Bailleur de fonds an der Regierung hirer Fuerschungspolitik gesäit. Dës Projet féiert och d'Notioun vun der Valorisation vun de Resultater an der effentlecher Fuerschung an. Et geet also och drëm, fir derfir ze suergen, datt d'Fuerschung um Terrain hire gréisstméiglechen Nidderschlag fënnit.

Zweetens: De Krees vun de Bénéficiaire soll erweidert ginn. Dës Krees gëtt folgendermoossen definéiert: Et sinn dat d'Établissements publics, déi d'Recherche als Haaptmission an hirer Base légale ageschriwwen hunn; effentlech Organismen, Services an Etablissements, déi an den Domänen, déi si betreffen, Fuerschungsaktivitéiten ënnerhuelen; d'Associatiounen an d'Fondatiounen ouni Gewënnzweck, déi dem modifizéierte Gesetz vum 21. Abrëll 1928 ënnerleien an déi Fuerschungsaktivitéiten ënnerhuelen an deenen Domänen, déi si ugin. Si brauchen awer en Agrément vum Minister.

Drëttens: Fir d'Autonomie vum FNR ze stärken, gesäit de Gesetzesprojet vir, datt d'Relationen tëscht dem FNR an dem Stat duerch eng méijährig Konventioun geregelt ginn, déi engersäits déi allgemeng Politik vum FNR, seng strategesch Choixen, seng Aktivitéiten a seng Ziler festhält an op där anerer Säit d'Mëttel definéiert, déi de Stat dofir zur Verfügung stellt.

Véiertens: D'Gouvernance vum FNR gëtt nei definéiert. Den FNR setzt sech aus zwee Organer zesummen, dem Verwaltungsrot an dem wëssenschaftleche Rot, dem sougenannte Conseil scientifique. Fir d'Autonomie vum FNR ze stärken, ginn d'Rollen vun deenen zwee Organer nei definéiert. An deem Kader gëtt och eng méi kloer Trennung tëscht den Aufgaben vum Conseil d'administration an deene vum Generalsekretär agefouert. De Verwaltungsrot ass fir d'Strategie zoustänneg, während de Generalsekretär fir d'Ëmsetzung vun deser Strategie responsabel zeechent.

(Mme Simone Beissel prend la présidence.)

Mat deem Projet soll de Verwaltungsrot an Zukunft nëmmen nach mat externe Perséinlechkeeten, déi also vun ausserhalb vum FNR a senger Bénéficiaire kommen, besat ginn. Dës Leit ginn ausgewielt en fonction vun hirer wëssenschaftlecher Kompetenz an hirer Expertise, och um Terrain vun der Valorisation vun der Recherche. D'Ziel vun de Membere geet erof vun 12 op 9.

Déi automatesch Verriedung vu verschiddene Ministère am Verwaltungsrot gëtt ofgeschaaft. Am Géigenzuch gesäit de Projet vir, datt d'Funktioen vum Regierungskommissär agefouert gëtt. Dës participéiert un de Sëtzenge vum Verwaltungsrot mat beroderender Stëmm, kann awer Décisiounen an suspens halen, wa se net de Reglementer oder de Kontrakter mam Stat entsprechen.

De Verwaltungsrot vum FNR muss och net méi all Entscheedungen, déi mat der Verwaltung vum Fong ze dinn hunn, huelen. De Conseil d'administration definéiert déi generell Politik an d'Strategie vum FNR am Kader vun der pluriannueller Konventioun. Et ass de Generalsekretär vum FNR, deen de Chef vum Exekutiv ass an deen den FNR dirigéiert, deen déi deegleche Entscheedungen an der Gestiou vum FNR hält. Hie rapportéiert regelméisseg un de Conseil d'administration. Dës Gesetzesprojet verstärkt also d'Roll vum Generalsekretär. Am Gesetz vum 1999 hat hie virun allem eng administrativ Aufgab.

Wat de Conseil scientifique ugeet, esou gëtt deen an deem Sënn reforméiert, datt an Zukunft d'Bénéficiaire vum FNR, y compris d'Uni, net méi an deem Gremium vertruede sinn. Dës geet jo och aus de Recommendations vum der OECD ervir. Dës ass noutwendeg, fir datt d'Entscheedungen an aller Transparenz an Neutralitéit geholl kënnen ginn.

Fënneftens: Den Dispositif vun den Aides an der Formation-Recherche gëtt modifizéiert an deem Sënn, datt och Écoles doctorales oder Fuerschungsschoulen iwwert de Wee vun den Aides à la Formation-Recherche finanziert ginn. D'Bewertungskritäre fir dës kollektiv Subventionen applizéiere sech net op den individuelle Projet, mä op de méijährige Programm vun der École doctorale. Dës Dokterschoule ginn net nëmmen eng wëssenschaftlech Kultur mat op de Wee, mä droen och maassgeblich dozou bäi, datt déi jonk Chercheuren - dat ass wichteg - an d'Berufsliewen integréiert ginn.

Lëtzebuerg stet am europäesche Kontext scho ganz vir, wat d'sozial Ofsecherung vun de Chercheuren ugeet, an och bei deenen, déi eréischt an der Recherche ufänken. Well a ville Länner d'Doktorande sech nach ëmmer mat Boursen ouni Aarbechtsvertrag, ouni integréiert Sozial- a Pensionsversicherungen zefridde musse ginn, hunn d'Doktoranden an d'Postdoktoranden hei zu Lëtzebuerg dee Virdeel, datt si ënner engem Aarbechtsvertrag kënnen schaffen.

Sechstens: Zum Schluss ass nach ze bemerken, datt dës Projet de loi d'Fonctionnarisation vum den Employés d'État virgesäit, déi am Département Recherche an Innovatioun vum Héichschoulministère schaffen. Well et am aktuelle Gesetz keen effektiv Kader gouf, hunn d'Renforcementer u Personal sech iwwert de Wee vu Rekrutement an der Carrière vum Employé d'État gemaach. Well dës Agenten awer Aufgabe wouerhuelen, déi mat der Ausféierung vun de souveräne Missiounen vum Stat ze dinn hunn, solle si an Zukunft vum Statsbeamtestatut bénéficiéieren.

Madame Presidentin, fir den Detail vun de verschiddenen Aise vum de Chambres professionnelles wëll ech aus Zäitgrënn op mäi schrëftleche Rapport verweisen. Ech wëll awer e puer Punkten opgräifen, déi de Statsrot a sengen Avisen opgeworf huet. De Conseil d'État huet säin Avis den 23. Oktober 2012 ginn. De Statsrot plädéiert fir eng optimiséiert Gouvernance vum Fuerschungssektor. D'Ännerungen, déi am Gesetzesprojet virgesi sinn, géifen zu enger Erweiterung vun de Kompetenzen vum FNR féieren, ouni awer e Rééquilibrage vu sengem Interventionsfeld an eng Restrukturatioun vun den effentlechen Institutiounen, déi vum Finanzement vum FNR profitéieren, ze viséieren.

De Statsrot schwätzt sech géint d'Éligibilitéit vun effentlechen Etablissements a Services aus, déi d'Recherche net als Haaptaktivitéit hunn an déi vun hiren eegene Budgete finanziert ginn. E schwätzt sech och géint Vereenungen a Stiftungen ouni Gewënnzweck aus, déi vum Finanzement vum FNR kéinte profitéieren. Den FNR kéint doduerer riskéieren, net nëmmen eng Superstruktur fir de Finanzement vun aneren Etablissements publics ze ginn, mä och eng Adress fir Demandes de subventions de tous genres.

Wat d'Zesummesetzung vum Verwaltungsrot vum FNR ugeet, esou plädéiert de Statsrot derfir, déi geplangten Dispositioun, déi eng équilibréiert Verriedung vu Männer a Frae virgesäit, ze prezisiéieren an eventuell Quoten anzeféieren. De Statsrot huet sech och géint d'Asetze vun engem Regierungskommissär ausgeschwat, deen eng Supervisiionsmissioun hätt. Dës Missioun kéint senger Meinung no vun de Verwaltungs- an Direktiounsgremien vum FNR gelescht ginn.

De Statsrot huet och d'Fro vun den Immobilien opgegraff, déi an d'Kapital vum FNR ze integréieren wieren. Et kéim zu enger Opposition formelle, wann dës Immobilien, also Gebaier, Equipementer, etc. net an enger separater Annex vum Gesetz opgelëscht géife ginn.

Dann huet de Statsrot sech och nach prinzipiell d'accord erkläert, fir den Employéen, déi am zoustännegen Département vum Héichschoulministère schaffen, de Statut vum Fonctionnaire ze ginn.



A sengem Avis complémentaire vum 30. Abrëll 2013 huet de Conseil d'État drop bestanen, datt d'Jetonen an d'Indemnitéiten, déi de Membere vum FNR-Verwaltungsrot, vum Conseil scientifique an dem Regierungskommissär bezuelt ginn, obligatoresch iwwer Règlement grand-ducal musse fixéiert ginn.

A sengem zweeten Avis complémentaire vum 20. Dezember 2013 huet de Statsrot d'Regierungsamendementen a puncto Propriété foncière vum FNR a Jetons de présence guttgeheescht. Et ass an der Kommissioun festgehalen ginn, datt d'Mise à disposition vu Gebaier, Equipementen an esou weider déi bescht Lösung ass, déi zréckbehalen ka gi fir all d'Établissements publics, déi am Beräich Héichschoul, Fuerschung an Innovatioun a terme an der Cité des Sciences zu Belval implantéiert ginn.

A sengem drëtten Avis complémentaire vum 6. Mee 2014 huet de Conseil d'État sech finalement derfir ausgeschwat, eng Loi générale auszeschaffen, wat déi équilibréiert Verriedung vun deenen zwee Geschlechter an de Verwaltungsrot vun den Établissements publics betrëfft. Am Regierungsprogramm steet nämlech geschriwwen, datt an de Verwaltungsrot vun den Établissements publics eng équilibréiert Verriedung tëschent Männer a Frae soll sinn. Dës wier e Pilier vun der Politik, déi d'Égalité tëschent Männer a Frae promovéiert.

Fir dës Zil ze erreechen, peilt d'Regierung bis 2019 eng Representatioun vu 40% vum ënnerrepräsentéierte Geschlecht un. D'Kommissioun huet dofir de 24. Februar 2014 en Amendement parlementaire an deem Sënn erageerecht. De Statsrot hätt also léiwer gesinn, wann eng Loi générale zu dësem Thema komm wier, well dat och vermeide géif, datt ähnlech Dispositiounen bei der Ausaarbechtung vun anere Gesetzestexten iwwersi kéinte ginn.

D'Kommissioun huet sech finalement majoritär derfir ausgeschwat, fir elo emol an dësem Gesetzesprojet an och am Projet de loi iwwert d'CRPen der Regierung hirem Wonsch Rechnung ze droen a festzehalen, datt d'Proportional vum de Membere vum Verwaltungsrot vun all Geschlecht net ënner 40% ka leien.

Souwäit also zu den Avisa vum Statsrot. Fir all aner Detailler verweisen ech, wéi gesot, op mäi schrëftleche Rapport.

Zum Schluss wëll ech all deene Leit Merci soen, déi zu dësem Rapport bäigedroen hunn, deen dës Méindeg 30. Juni an der Kommissioun majoritär ugeholl gouf. Merci der Presidentin an de Memberen aus der zoustänneger Héichschoulkommissioun fir hir Iwwerleeungen an hir konstruktiv Mataarbecht. E besonnesche Merci geet och un d'Madame Huberty, dat ass d'Sekretärin vun der Héichschoulkommissioun, déi déi redaktionell Aarbecht ronderëm dës Gesetzesprojet wéi gewinnt mat vill Kompetenz an Zouverlässigkeet begleet huet. Merci och de Beamten aus dem Héichschoulministère, déi der Kommissioun Erklärungen geléiwert hunn.

Ech schlësse meng mëndlech Interventioun, andeems ech dann och den Accord vun der Fraktioun vun der Demokratescher Partei zu dësem Projet de loi abréngen. Ech soen lech Merci.

► **Plusieurs voix.** - Très bien!

► **Mme la Présidente.** - Merci dem Här André Bauler fir säi breet gefächerte Rapport an dësem interessanten an esou wichtege Secteur fir Lëtzebuerg. A Merci och fir déi léif Mercie vun Ärer Säit un eis alleguerten.

Als éischt ageschriwwen Riednerin ruffen ech elo op d'Tribün d'Madame Martine Hansen.

Discussion générale

► **Mme Martine Hansen (CSV).** - Merci, Madame Presidentin. Als Alleréischte e grouse Merci un de Rapporteur, den Här André Bauler, fir dee ganz detailléierte Rapport. De Rapport war esou detailléiert, datt ech mech, mengen ech, ka mat guddem Gewësse relativ kuerz halen. An ech ginn dovunner aus, datt déi mannst vun lech do eppes dergéint hunn.

Madame Presidentin, Dir Dammen an Dir Hären, Lëtzebuerg huet am Verglach zu aneren europäesche Länner net nëmmen eng relativ jonk Geschicht am Beräich vun der Recherche, mä och eng net ganz typesch Geschicht, an dat, well mer scho Fuerschungszentren haten, ier mer iwwerhaupt eng Uni kritt hunn. No-deems Luxinnovation viru genee 30 Joer gegrënnt ginn ass, ass 1987 de legale Kader vun der Recherche publique définéiert ginn an déi zwee éischt CRPen, de CRP Lippmann an de CRP Tudor, si gegrënnt ginn. De CRP Santé kounn dunn 1988 an de CEPS/Institute 1989 zerëien. Och d'Upassung vun dësem Gesetzter ass zimlech dréngend.

Datt d'Verstärkung vun der Innovatioun an domadder gekoppelt vun der Recherche absolut noutwendeg war, fir eis Économie erëm méi

ze diversifizéieren, dat war ni a Fro gestallt. Mä dës jonk Recherche, déi fir déi ekonomesch Entwécklung vun eisem Land e wichtege Pfeiler ass, huet e richtege Kader gebraucht. Dofir ass 1999 dunn den FNR an och den Héichschoul-, Kultur- a Recherche-Ministère gegrënnt ginn.

Ech wëll kuerz op déi eigentlech Missioun vum FNR zréckkommen, och wa mäi Virriedner dat scho gemaach huet. De Fonds National de la Recherche soll Impulser fir d'Fuerschung zu Lëtzebuerg ginn. Eng vun den Aufgaben ass d'Matfinanzéierung vun de Fuerschungsprogrammen. Fir awer kënnen eng Selektioun vun deenen ze ënnerstëtzende Programmer ze maachen, hu missen déi national Prioritéiten vun der Recherche festgeluecht ginn. Dës sinn 2007 opgrond vun de Recommandatiounen vum FNR am Kader vu senger FNR-Foresight éischtmools festgehalen ginn.

Dank dem FNR hu sech zu Lëtzebuerg iwwerall déi Joren thematesch Beräicher an der Fuerschung profiléiert. Den FNR huet sech zu engem onëmgänglechen, absolut wichtege, zuverlässigen an effizienten Organ am Lëtzeburger Fuerschungswiesen entwéckelt. Dofir wëll ech op dëser Plaz all den Acteuren vum FNR an och vum Héichschoulministère, déi an deem Beräich schaffen - déi setzen do uewen -, e grouse Merci soen. Den FNR ass eist Haaptinstrument, fir eng adequat Ëmsetzung vun der Recherche ze garantéieren.

Madame President, Dir Dammen an Dir Hären, eng Upassung vum Gesetz vum 1999 ass éischters duergeseeht den eegenen Erfolleg, duergeseeht déi rasant Entwécklung vun eiser Recherche, virun allem vun der Recherche publique, noutwendeg ginn. Wéi rasant d'Evolutioun vun der Recherche hei zu Lëtzebuerg war, léisst sech ganz däitlech duergeseeht d'Entwécklung vun de Budgetsdépenses an dësem Beräich beleegen:

- Am Joer 2000 goufen 28 Milliounen Euro ëffentlech Gelder fir den RDI-Beräich ausginn; 13 Joer duerno hat sech dat verzéngfacht.

- 2000 louch de Budget vum FNR fir den RDI-Beräich bei 1,2 Milliounen Euro, 13 Joer duerno bei 52 Milliounen Euro.

En zousätzlechen Ustouss, fir d'Gesetz unzepassen, kounn, sou wéi den Här Bauler et gesot huet, duergeseeht d'Recommandatiounen vun der OCDE. Den Haaptobjektiv vun där Etüd, déi vum Fuerschungsministère an Opdrag gi war, war, fir d'Stärken an d'Schwächen vun eiser Recherche ze definéieren a virun allem och fir d'Governance vun der ëffentlecher Recherche ze analyséieren, well d'Effizienz vun dëser Governance ganz staark de sozioekonomeschen Impakt, dee mer eis jo vun der Recherche erwaarden, beaflosst.

Ech wëll elo net nach eemol am Detail op all d'Upassungen agoen, mä trotzdem wëll ech heizou e puer Saachen soen.

Wichtig ass et, datt d'Missioun vum FNR ugepasst gi sinn. Säi Rôle als Bailleur de fonds a seng Bedeitung, fir d'Politique gouvernementale am Beräich vun der Recherche ëmzesetzen, ginn zousätzlech ënnerstrach. Wichtig ass awer och, datt den FNR zu der Valorisation vun de Resultater aus der Recherche publique bäidréit, fir datt dës Resultater e positiven a konstruktiven Impakt op d'Entwécklung vun der Wirtschaft, eiser Gesellschaft an eiser Kultur hunn.

Datt d'Feld vun de méigleche Bénéficiairen erweidert gëtt, kann nëmme virdeelhaft fir d'Entwécklung vun eiser Recherche sinn. Natierlech ginn déi eenzel virgestallte Projekte vun deenen eenzelne méigleche Bénéficiairen nach vum FNR evaluéiert, ier decidéiert gëtt, ob de Projet ënnerstëtz gëtt oder net. Et geet also hei an alleréischter Linn ëm d'Qualitéit vun der Recherche an net ëm d'Quantitéit, wéi een dat vläicht kéint mengen, doduerch datt d'Éligibilitéit méi grouss gemaach gëtt.

Och d'Governance vum FNR huet missen ugepasst ginn. De Projet de loi 6420 féiert de Prinzip vun der Muechtentrennung um Niveau vun der Governance an. Déi jeeeweileg Kompetenz vum Conseil d'administration, vum Conseil scientifique a vum Secrétaire général si ganz kloer opgedeeelt.

De Conseil scientifique soll de Conseil d'administration assistéieren, vun deem en d'Berodermission am wëssenschaftleche Beräich huet. Am Conseil scientifique dierf kee Bénéficiaire méi dra sinn; dat ass absolut noutwendeg, fir d'Transparenz an d'Neutralitéit ze garantéieren.

Am Conseil d'administration sinn d'Ministère net méi direkt verueuden. Als Contrepartie, sou wéi den Här Bauler et gesot huet, a well virun allem och ee bemierkenswäert Budget trotzdem zur Verfügung gestallt gëtt, ass de Commissaire du Gouvernement, sou wéi bei der Uni, als Observateur mat Voix consultative agefouert ginn.

Engersäits gëtt een also dem FNR eng méi grouss Autonomie an de Finanzen, an der Ad-

ministratioun, an der Recherche. Anerersäits kritt hien awer och méi Verantwortung do duergeseeht a muss deemno och fir Transparenz an Effikasitéit suergen. De Contrat de performance ass en zousätzlecht Instrument vun der Regierung, fir zesumme mam FNR d'Ziler vun der Politik an dësem Beräich festzehalen.

Och d'Aféierung vun der Aide à la Formation-Recherche «collective», déi et elo erlaabt, fir d'Écoles doctorales oder d'Écoles de recherche duergeseeht den Intermédiaire vun der AFR matzefinanzéieren, ass duergeseeht d'Entwécklung vun der Recherche zu Lëtzebuerg absolut noutwendeg ginn a wäert et och erlaben, d'Chercheuren iwwert dës schoulesch Strukturen ze féieren an hinnen och bei enger berufflecher Carrière spéiderhin ze hëllefen.

D'Fonctionariséierung vun de sechs Employés d'État am Fuerschungsdepartement ass ebenfalls eng absolut wichtege Moossnam a war dofir vum deemolegen CSV-Minister virgeschloen ginn.

Madame President, Dir Dammen an Dir Hären, erlaabt mer nach eng lescht Bemierkung, ier ech zum Schluss kommen.

An zwar wëll ech och nach kuerz op d'Representatioun vun de verschiddene Geschlechter an de verschiddene Conseilen agoen. Als CSV hate mer och schonns 2012 an der éischter Versioun vum Projet de loi 30% virgesi fir dat manner representéiert Geschlecht. Dir hutt dës Prozentsaz, sou wéi et an Ärem Regierungsprogramm steet, op 40% gehuewen, wat a priori och net schlecht ass, falls Der eben d'Leit fannt. Dat ass am Beräich vun de Science leider net ëmmer evident.

Ech wëll awer nach eemol drop hiweisen, datt mir als CSV - sou wéi och de Conseil d'État - et besser fonnt hätten, wann Der een allgemengt Gesetz fir all d'Établissement-publics gemaach hätt, fir eben ze verhéieren, datt mer all eenzelt Gesetz mussen upassen, respektiv fir ze verhéieren, datt dës Saach emol eng kéier kéint an engem Gesetz vergiess ginn.

Dat gesot, Madame President, Dir Dammen an Dir Hären, wëll ech ofschléissend nach eemol betounen, datt déi ganz positiv Entwécklung vun der Recherche hei zu Lëtzebuerg och e Beweis fir dës laang, geziilt a geschlossene Politik vun de Regierungen zënter den 80er Joren ass.

D'CSV huet sech bis d'lescht Joer dës Responsabilitéit och ëmmer ugeholl a mir sinn der fester Iwwerzeugung, datt mer d'Recherche an d'Innovatioun wäit no vir bruecht hunn, zesumme selbstverständlech mat eise Partner. D'CSV huet och jorelaang op eng budgetär Prioritéit fir dës Beräich gepocht, an dat huet sech ausbezuelt.

D'Recherche ass eis Matière première, eis éischt Ressource, déi eis d'Méiglechkeete gëtt, eis wirtschaftlech, gesellschaftlech a kulturell sou ze entwéckelen, wéi mer dat brauchen. Mir dierfen eis déi Chance net entgoe loossen, zemools an Zäiten, wou viles geännert huet - am Finanzwesen oder och an der Industrie. A viles wäert sech och nach änneren.

Den FNR ass hei en onëmgänglechen Acteur. Et ass also méi wéi wichtege, dës Institutioun déi adequat an adaptéiert Moyene weiderhin zur Verfügung ze stellen an hire legale Kader unzepassen.

Dir Dammen an Dir Hären, wéi Der gesitt: Ech si begeeschtert vun der Recherche an och vum FNR. Ech ginn natierlech den Accord vun der CSV-Fraktioun zu dësem Projet de loi. Merci.

► **Une voix.** - Très bien!

► **Mme la Présidente.** - Merci, Madame Hansen, fir Är flott Interventioun. Als nächst Riednerin ass d'Madame Taina Bofferding ageschriwwen.

► **Mme Taina Bofferding (LSAP).** - Madame Presidentin, Dir Dammen an Dir Hären, aus engem Avis zur Beurteilung vun der Strategie vum FNR, deen de Fuerschungsministère viru Joren an Opdrag ginn huet, geet ervir, dass den FNR maassgeblech dozou bäidréit, déi wëssenschaftlech Qualitéit vun den ëffentlechen Fuerschungsprojeten ze erhéien an d'Wëssenskulturfeld am Land ze féieren.

Wëssenschaft a Fuerschung mat ëffentlechen Gelder ze ënnerstëtzten, ergëtt sech aus der zentraler Bedeitung, déi der Produktioun vun neiem Wëssen an dem Weiderginn un d'Gesellschaft zeguttkënnt. An domadder zielt déi systematesch Sich no neien Erkenntnisser ënner Uwendung vu wëssenschaftlechen Methoden a geplanter Form zu der gréisste Grondlage vun enger positiver Zukunftsentwécklung.

Wëssenschaft a Fuerschung si Moteuren vun der gesellschaftlecher, technescher a wirtschaftlecher Entwécklung vun eisem Land an domadder och e wichtege Bäitrag zur Sécherung vu Wuelstand a Liwensqualitéit. Wëssenschaft a Fuerschung sinn net «de l'art pour l'art», mä sollen och ëmmer eng gesellschaftlech Rele-

vanz hunn. Wann Institutiounen mat Steiergeld finanziéiert ginn, mussen se alle Beräicher vun der Gesellschaft zeguttkommen. Dofir ass et och richtege, dass den FNR weiderhin aktiv dozou bäidréit, dass dat de Fall ass.

Wëssen ass en ëffentlech Gutt, a well Grondlagefuerschung an applizéiert Fuerschung zum Beispill net nëmme Bildung a Kultur an eiser Gesellschaft beräicheren, mä och Wuelstand a vollekswirtschaftlechen Erfolleg sécheren, mussen se vum Stat ëmfangräich erméiglecht an ënnerstëtz ginn. An dës gehéiert zu de wictegsten Aufgaben vun engem moderne Stat.

Fir d'sozialistesche Fraktioun ass kloer, dass d'Politik an der Flicht ass, der Wëssenschaft, a speziell der ëffentlecher Fuerschung, genuch Entfaltungsméiglechkeeten ze ginn, a se net aus der finanzpolitescher Perspektiv eraus ënnert dem Deckmantel vun der Effizienzsteigerung an e wirtschaftslastegte Korsett dierf zwéngen.

Fuerschung brauch e staarken ëffentleche Sektur. Eng finanziell a konzeptuell Kooperatioun mat der Wirtschaft gëtt wichtege Impulser fir d'Fuerschung an d'Innovatioun. Dës dierf awer net ëffentlech diskutéiert a gesaten Objektiv vun der Wëssenschaftsentwécklung ersetzen. Fuerschungsprojeten, an deenen hirem Zentrum just de finanziellen Notzen - fir net ze soen: just de Profit - steet, kënnen fir d'LSAP keng Antwort op déi sozial an ekonomesch Erausforderungen a Problemer ginn, déi virun eis stinn. Dofir nach eemol: D'Fuerschung an d'Entwécklung mussen sech virun allem un de Besoine vun der Gesellschaft orientéieren an net just un den Interesse vun de Grousskonzernen.

Nun, Dir Dammen an Dir Hären, d'Fuerschung kascht Geld. A mat der Kreatioun vum FNR viru 15 Joer gouf eng wichtege Finanzierungsquelle fir Wëssenschaftlerinnen a Wëssenschaftler geschaffen. Mat dësem Instrument ass och sécher gestallt, dass Lëtzebuerg an d'Wëssenschaft, d'Fuerschung an d'Entwécklung investéiert.

De Stat suert mat sengen Aktivitéiten a finanzielle Bäitrag derfir, dass d'Fuerschung an d'Innovatioun e gudden, villsäitegen Nährbuedem zu Lëtzebuerg virfannen. Dozou gehéieren zu den direkten Investitiounen an Hëllefstellung vill weider Tätigkeeten, déi op den éischte Bléck éischter e lasche Lien hunn, wéi d'Investitiounen an d'Infrastrukturen an an d'Bildungsqualität.

Fir d'sozialistesche Fraktioun muss d'Fuerschungspolitik finanziell a konzeptuell esou ausgerichtet sinn, dass se den internationale Verflechtungen vu Wëssenschaft a Wirtschaft, de steigende Käschte vun der Fuerschung, der Komplexitéit vun der Fuerschungsaktivitéiten an dem Strukturwandel vun der Fuerschungsorganisatiounen begéint.

D'Haaptaufgaben vum FNR besteet an der konkurrenzhalter Auswierkung vun der beschte Fuerschungsvirgäbe vun der Chercheuren an an der Finanzéierung dovun. An dat geet vum Doktorand iwwert de Postdoktorand, de Junior Scientist bis hin zum Senior Scientist. Den FNR bréngt d'Fuerschung weider an d'Effentlechkeet, woumadder mir wäertvollt Wësse fir d'Gesellschaft, d'Wirtschaft an d'Politik kréien. Och soll de wëssenschaftlechen Nowues bei der Sich no neien Erkenntnisser ënnerstëtz ginn. Hei spillt d'Promotioun vun der Culture scientifique, wéi dem Science Festival, dee virunner schonn ugeschwat ginn ass, oder dem Internetsite science.lu eng wichtege Roll, an deemno ass et och gutt, dass dës Elementer am Gesetz solle festgehalen ginn.

Weider mécht eng Reformulatioun vun den Tâchen vum FNR. Säi Generalsekretär hat an engem Zeitungsartikel um Ufank vu sengem Mandat ugefouert, dass den FNR als onofhängege Lien tëschent der Regierung an der Fuerschungsrichtungen ze considéiere wär.

Den FNR beréit d'Regierung an ëffentlech Aariichtungen a wëssenschaftleche Froen. Als eng Stëmm vun der Wëssenschaft am politeschen a gesellschaftlechen Discours begleet de Fong politesch Entscheedungsprozesser mat wëssenschaftlechem Sachverstand. Fir d'Vergi vun ëffentlechen Fuerschungsgelder brauche mer en demokrateschen, partizipatoreschen a verlässlechen Entscheedungsprozess, dee fräi vun Interessenkonflikt ass an net vun der Industrie dominéiert gëtt. An de Fong ass e Garant dofir.

Fir d'Glawierdegkeet vun der Wëssenschaft ass d'Schaf vum Transparenz an der Finanzéierung noutwendeg. Hei entscheet net e Lous dorwäert, wien d'Gelder kritt, mä verständlech an transparent Krittären. En externen Avis duergeseeht

Experten ass wesentlech fir Transparenz a Fairness vum Auswielverfahren.

Den FNR ass net just e wichtegt Instrument bei der Verdeelung vu Gelder, mä och bei der Sécherung vun der Qualitéit vun der Fuerschung, déi ënner anerem doduerch ginn ass, dass Experten a renomméiert Wëssenschaftler aus dem Ausland kontrolléieren a beuerteelen.

Wat d'Eligibilitéit betrëfft, fir iwwerhaupt därefen eng Demande ze stellen, sou ass oft kritiséiert ginn, dass d'Wielbarkeet ze streng geregelt wär. D'LSAP begréisst deemno, dass mam neie Gesetz weider ëffentlech Etablissementer a Servicer souwéi och Asblen a Fondatiounen, déi sech am Beräich vun der Fuerschung respektiv fir d'Fuerschung engagéieren, künfteg därefen eng Demande fir eng finanziell Ënnerstëtzung eraginn.

Weider ass et fir meng Partei och verständlech, dass d'Aides à la Formation-Recherche, also déi Stipendien, déi virun - mengen ech - véier oder aacht Joer agefouert goufen, dass déi och fir Projeten, déi méi am Allgemengen, also als Ensemble ze kucke sinn, künfteg ze ënnerstëtzt kënne genotzt ginn.

Neierdénks soll de Fong och aktiv un der Valorisation des résultats vun der ëffentlecher Fuerschung deelhuefen, woumadder gemengt ass, dass Fuerschungsergebnisser méiglechst schnell dem prakteschen Notzen zougefuert solle ginn.

Eng weider Recommandatioun, déi d'OECD an hirer Analys opgefuert hat, ass eng méi kloer Definitioun vun de Missiounen an Objektiv vum den eenzelnen Acteuren, woubäi eng besser Gouvernance ugestriift soll ginn. Wichteg ass, dass den FNR gestärkt gëtt an d'Matwierke vun de Memberen do konzentriert gëtt, wou et fir Förderungsdecisiounen am effikasssten ass. De Partage des pouvoirs mécht deemno Sënn.

Fir der Objektivitéit gerecht ze ginn, sollen am Conseil d'administration nach just Membere vu baussen als Experten en fonction vun hire Kompetenzen erausgesicht ginn. D'Aufgab vum Verwaltungsrot besteet net méi doranner, Entscheedungen zur Gestéioun vum Fong ze huelen, mä déi generell politesch Ausrichtung a Strategie ze bestëmmen am Kader vun den Ziler, déi an der Convention pluriannuelle festgehal ginn.

Weider Ännerunge gesi vir, dass Membere vum Conseil scientifique net méi gläichzäiteg Bénéficiaire vum FNR därefe sinn, wat dësem consultativen Organ méi Transparenz an Objektivitéit a sengen Decisiounen erlaabt. Och d'Membere vun de vereenzelte Ministère sollen net méi am Conseil d'administration siéigéieren.

Fir awer eng gewësse Kontroll iwwert d'Etablissement ze hunn, am Sënn vun der technescher an administrativer Handhabung wéi och dem Observéieren vun de gesetzleche Regelungen, wéi bei de Konventiounen, gëtt de Commissaire du Gouvernement agefuert.

Och dem Chef vun der Exekutiv, also dem Generalsekretär säin Tätigkeetsfeld soll erweidert ginn, andeem hie sech net méi op den administrative Beräich limitéiert, mä künfteg och den „daily business“ gëreiere soll an an deem Kontext all néideg Decisioun kann huelen.

E leschte Punkt, op deem ech wëll agoen, ass e ganz wichtige fir meng Partei, well mer mam Stëmme vun dësem Gesetz och d'Chancen- an d'Geschlechtergerechtegkeet an de Verwaltungsreit ganz gezielt förderen. Haut brénge mer de Steen un d'Rulle mat der Disposition, dass am Verwaltungsrot kee Geschlecht mat manner wéi 40% däreft vertrauede sinn. Eis Verfassung schreift déi rechtlech an tatsächlech Gläichstellung vu Fra a Mann vir. Dass d'Regierung se an hirem Programm festgehalen huet a mir haut als Chamber enger Geschlechterquot zoustëmmen, entsprécht eigentlech just der Erfüllung vun enger verfassungsméisseger Virgab.

Ouni Quot wär de Fraendeel - well dat ass nun eemol dat Geschlecht, wat hei viséiert gëtt - am CA bal net oder nëmme lues erhéicht ginn. Fräiwëlleg Vereenbarungen hunn an de vergaangene Joren näischt bruecht, well bis haut ass et net verbueden, dat Geschlecht, wat an der Minoritéit ass, ze förderen oder carrément Gremie paritéitesch ze besetzen. Eng Quot ass keen Allheilmittel, mä hëlleft, de Prozess sécherlech méi séier virunzedreihen. An dobäi soll den ëffentleche Secteur eng Virbildfonction anhuelen a sech bewegen, amplaz weiderhin e schlecht Beispill duerstellen.

Ofschléissend wëll ech da betounen, dass haut fir d'Éischt eng Geschlechterquot an engem Gesetz festgehal gëtt, an dat, Dir Dammen an

Dir Hären, ass wichtig an et ass richtig, an zwar esou laang, bis dat Selbstverständlech endlech alideeglech gëtt.

An dësem Sënn: Merci. An ech ginn dann och heimadder den Accord vu menger Fraktioun zum Gesetzestext.

Ech mengen, ech hat am Ufank vergiess, dem Här Bauler Merci ze soe fir säi Rapport; dann huelen ech dat selbstverständlech no.

Villmools Merci.

► **Plusieurs voix.** - Très bien!

► **Mme la Présidente.** - Merci, Madame Bofferdin, fir déi interessant Ried, wou Der nottament d'Wichtigkeet vun der Fuerschung an der Fuerschungspolitik an enger moderner Gesellschaft ënnersträicht an nach eng extra Lanz fir d'Gens femina hei briecht.

Elo ass et um Här Claude Adam, dem nächsten ageschriwwene Riedner, deen ech hei op d'Tribün bidden.

► **M. Claude Adam** (déi gréng). - Merci, Madame Presidentin. Et war e laange Wee, bis dëse Projet hei an d'Plénière komm ass. Den Dépôt war jo schonn am Abrëll 2012. Mir si beim drëtten Rapporteur ukomm. Mir hunn nom Avis vum Statsrot zweemol Amendementen an der Chamberskommissioun agereecht an och d'Regierung hat den Text amendéiert, sou datt de Statsrot en éischten, zweeten a schlussendlech en drëtten Avis complémentaire huet missen ofginn.

Ech wollt dann, fir et net ze vergiessen, direkt dem honorabelen Här Bauler villmools Merci soe fir säi gudden mëndlechen a schréffleche Rapport. An engems soen ech och senge Virgänger Merci, well déi Aarbecht huet sech jo elo iwwer eng laang Zäit gezunn.

Dee Gesetzesprojet huet, wéi dat sech gehéiert, en Exposé des motifs, an deen Exposé fänkt u mat engem Historique vun e puer wichtige Statiounen vun der Politik vun der Recherche am leschte Jorzéngt.

Ouni hei wëllen op den Detail anzegoen, ass et mer awer wichtig, nach eng kéier drun ze erënneren, datt mir zu Lëtzebuerg immens vill Suen an d'Recherche investéiert hunn. Esou sinn déi Zommen, déi aus dem Statsbudget an d'Recherche gefloss sinn, an deene leschte Joren enorm an d'Luucht gaangen: vun 28 Milliounen am Joer 2000 op 280 Milliounen am Joer 2012. An eréischt d'lescht Woch huet de Statssekretär Marc Hansen eng Konvention mam FNR fir d'Joren 2014 bis 2017 ënnerschriwwen, iwwer eng Dotatioun vun 232 Milliounen Euro, Suen, déi den FNR mat Hëllef vu senge Programmer a Konditiounen un d'Acteuren vun der Recherche publique weiderleet. A bei dës 232 Milliounen, déi den FNR kritt, kommen nach 854,4 Milliounen Euro derbäi, déi de Stat direkt an d'Uni an an d'CRPen investéiert.

Mir haten zu Lëtzebuerg ëmmer déi speziell Situatioun, datt d'Recherche privée verhältnisméisseg vill méi héich louch wéi d'Recherche publique. Bedauerlecherweis weisen d'Chiffere, datt mer déi Dynamik vun den Dépense vun der ëffentlecher Hand leider net am Privatséktor erëmfannen. Hei geet d'Héicht vun den Investissementer leider net vu Joer zu Joer erop. Hei gëtt et eng gewësse Stagnatioun, souguer e lichte Réckgang vun den Investissementer.

Ee Problem ass zum Beispill, datt vill vun de Betriber bei eis am Land keng Lëtzeburger Betriber sinn, mä Filiale vun internationale Konzerne zu Lëtzebuerg. Dat gëllt fir de Bankesektor, awer net nëmme fir dee Secteur.

Et entzitt sich menger Kenntnis, ob et eng Relatioun gëtt tëschent dem Eropgoe vun de staatlechen Investissementer an dem Eropgoe vun de privaten. Et ass awer eng Entwécklung, vun där ech mengen, datt si et verdéngt, genee ënnert d'Lupp geholl ze ginn.

Mir stieche vill ëffentlech Gelder an d'Recherche, mä eigentlech leie mer nach ëmmer ënnert deenen Ziler, déi sech déi lescht Regierung alleguer gestach haten. Zënter 2004 wëlle mer 1% vun eisem PIB investéieren. 2012 louche mer bei 0,66%. An och, wa mer all Budgetposte sollen a mussen op hiert Spuerpotenzial ënnersichen, da solle mer eis awer bewosst sinn, datt mer grad mam Domän vun der Recherche och d'Basis vun der zukünftiger Entwécklung an eisem Land leeën.

Mir hu mat der Schafung vun der Uni Lëtzebuerg am Joer 2003 och nach e weideren zukunftssträchtegen an deiere Projet lancéiert. Hei sinn d'Dépense laang Zäit och all Joer ëm en zweestellige Prozentsaz geklommen. An och, wann den Här Tarrach viru Kuerzem gemengt hat, hie géif net all déi Gelder kréien, déi e gäre gehat hätt, ginn ech dovun aus, datt eis Regierung och weiderhin eng Prioritéit am Opbau an am Ausbau vun eiser Uni gesäit.

Leif Kolleegen a Kolleginnen, méi wéi 25 Joer no der Schafung vun den éischten Centres de

recherche publics, gutt zéng Joer no der Schafung vun der Uni Lëtzebuerg a ronn 15 Joer no der Schafung vum FNR kënne mir hei zu Lëtzebuerg houerfreg sinn op déi Investissementer, déi mir hei gemaach hunn.

D'Héichschoulpolitik vun eisem Land léisst sech net op eng méi oder manner grousszügig Bourssepolitik reduzéieren. Do kréie mer jo nach genuch Zäit, fir driwwer ze diskutéieren am Detail. Haut hu mer eng ronn 5.000 Leit, déi am Beräich vun der Recherche schaffen, an och dat ass eppes, wourop mer houerfreg kënne sinn.

Am Numm vun der grénger Fraktioun kann ech just ausdrécklech déi Efforte vun deene leschte Regierungen a vun dëser Regierung am Héichschoul- a Fuerschungsberäich ënnerstëtzen. Dat gëllt fir déi allgemeng Ustrengungen, am Detail hu mir natierlech schonn eng Rei Differenzen zu deem, wat déi viregt Regierungen décidéiert haten. Ech wäert, wann och net haut, bestëmmt nach Geleeënheet kréien, dorop ze schwätzen ze kommen.

Eng kruzial Fro fir d'Politik ass natierlech, ob mer déi Suen, déi mer an de Fuerschungs- an Héichschoulberäich investéieren, och beschtméiglech investéieren. Eng Fro stellen ech mer schonn zimlech laang, an ech erlabe mer och haut, dem Fuerschungsminister se hei op dëser Plaz ze stellen.

Eise Fuerschungsministère ass jo eigentlech ee Wahnsinnsministère mat engem verréckte Wuesstum. Wéi ass eise Fuerschungsministère opgestallt? Hu mer genuch Personal a Sachkompetenz, fir mat guddem Gewësse kënnen ze behaapten, datt mer d'Entwécklung vum Fuerschungssektor am Grëff hätten?

Definiéiere mir an eisem Ministère eis Fuerschungspolitik oder gi mir just Suen, vill Suen aus, an anerer décidéieren, wat mat deene Sue geschitt? Wat erwaarde mir eis vun der Fuerschung? Misste mer net och de Conseil supérieur de la recherche opwäerten? Bräichte mer net eppes wéi en „chief adviser“ am Fuerschungsministère, ähnlech wéi et esou e Poste bei der EU-Kommissioun gëtt?

Et wier an eisen Aen net schlecht, wa mer op Aenhéicht mat den Experte vun der OCDE kéinte matdiskutéieren. Ech stellen net a Fro, datt mer déi Expertise vun der OCDE brauchen an drop zréckgräifen. Mir kënnen och gréisstendeels mat der Analys an de Recommandatiounen vun 2006 d'accord sinn, wou ënner anerem eng Gouvernance déficiente a verschiddene Beräicher vu Recherche & Développement an Innovatioun festgestallt gëtt. Ech muss awer och soen, datt ech zimlech onzufriede war mat der Entrevue, déi mer an der Héichschoulkommissioun mat de Vertrieder vun der OCDE haten.

Mir sinn déi Éischt, déi eng zweet Etüd vun der OCDE froen, mat där mer eis da bescheinege loosse, ob mer eis Hausaufgabe gemaach hunn, déi mer bei der éischter Etüd opgebrummt kruten. Och wann ee Rapport eréischt fir 2015 virgesinn ass, hunn d'Experten duerchblécke gelooss, datt mer a kuerzer Zäit zimlech gutt geschafft hätten an datt et elo drëm géif goen, wéi mer déi nächst Etappe géifen definéieren.

D'OCDE hat eng ganz Rei Entrevuë mat Acteuren aus der Recherche publique an aus der Recherche privée. Ech wënsche mer, datt déi Entrevuë besser geplangt a strukturéiert ware wéi déi Entrevue mat eiser Chamberskommissioun, dat kéint der Seriositéit vum Rapport nëmme guttdinn.

Komme mer da bei den eigentlechen Objet vum Projet de loi vun haut, den FNR. Den FNR - dat ass alles schonn ënner enger ähnlecher Form gesot ginn, ech kann et duerfir kuerz maachen, et ass mer awer wichtig, fir et nach ze rappeléieren -, den FNR ass 1999 an d'Liewe geruff ginn. En ënnerstëtzt d'Recherche am Secteur public. De Rôle vum FNR ass méi grouss ginn am Laf vun de Joren. Seng Part vum Budget huet sech op plus/minus 20% vun der Gesamtveloppe agependelt.

Den FNR hat vun Ufank un zwou Missiounen, zwou Haaptmissiounen: éischtens, Suen aus ëffentlechen a private Quellen asammelen, gëreieren an ausginn, fir Recherche an Développement am ëffentleche Secteur ze féieren, an zweetens, e permanenten a fundéierten Denkprozess iwwert d'Orientéierung vun der nationaler Recherche- an Développements-Politik ze ënnerhalen.

Den FNR huet sech duerfir an der Vergaangeneheet och eng Rei Instrumenter geschafen, déi all hir spezifesch Ziler hunn an déi sech, menges Wëssens, och alleguer bewährt hunn. Ech nennen der just e puer: ATTRACT, CORE, INTER, PEARL.

Mam Gesetz vum 19. August 2008 iwwert d'Aides à la Formation-Recherche huet den FNR d'Aufgab kritt, och dës Hëlfelezen ze gëreie-

ren. Mat den Aides à la Formation-Recherche kënnen eenzel Fuerscher ënnerstëtzt gi bei hiren doktoralen oder postdoktorale Studien zu Lëtzebuerg an och am Ausland. Eng vun den Haaptkonsequenzen vun der Analys vun der OCDE vun 2006 war d'Ausschaffe vun de Contrats de performance ënner anerem och mat dem FNR.

Da gëtt et och nach eng Evaluatioun vum Fonctionnement vum FNR vun enger Sociétéit „Innovation, Territoires et Développement en Europe“. Déi Firma gëtt et zwar schonn zënter 2011 net méi, hir Recommandatiounen sinn awer beim FNR gutt opgehol ginn, an um Niveau vun der Gouvernance misste se och an dësem Gesetzesprojet ëmgesat ginn.

An domat wëllt ech dann och nach eng kéier op déi Haaptelementer vun eisem Gesetzesprojet 6420 kuerz agoen a se kommentéieren.

Éischtens, d'Missioun vum FNR ginn opgefrescht. Mir hu keng Problemer mat der Neidefinitioun vun de Missiounen vum FNR. Mir gënnen och kee fundamentale Changement. Et gëtt kloergestallt, datt d'Haaptmissioun vum FNR d'Gestioun an d'Attributioun vu Fuerschungsgelder ass, datt et awer och weider eng Missioun vum FNR bleift, sech am Prozess vun der Entwécklung vun der Fuerschung zu Lëtzebuerg anzebréngen.

Méi explizit wéi am ale Gesetz steet am neie Gesetz, datt et eng Aufgab vum FNR ass, sech och ëm - an ech zitéieren - «l'application et la valorisation des résultats de recherche de ces programmes» ze këmmen.

Dat fanne mer engersäits gutt, dat mécht nun emol einfach Sënn, an net nëmme an den ekonomesche Beräicher, mä och, wat d'Sozialstudie betrëfft. Ënner anerem och wëlle mer awer drun erënneren, datt et hei lwwerschneidungen mat de Missiounen vun Luxinnovation gëtt an datt mer mussen oppassen, datt mer keen double Emploi kréien.

Zweetens, de Kader vun den Organismen, déi eng Hëllef vum FNR kënne kréien, gëtt erweidert. Och dëse Punkt begreisse mer ausdrécklech.

Wann déi zwee éischt Punkten am neie Gesetz éischer eng Ofrëschrung vun dem Inhalt vun de Punkten 1 bis 4 vum ale Gesetz sinn, ass et virun allem de Punkt 3, deen eng Neierung bréngt: Associatiounen a Fondatiounen kënnen iwwert den FNR gefërdert ginn. Dat fanne mer gutt an et versteet sech vum selwen, datt de Fait, datt eng Associatioun oder eng Institutioun ka gefërdert ginn, net heescht, datt se automatesch gefërdert ginn, mä selbstverständlech mussen och si Kritären erfëllen, fir an de Genoss vun enger Hëllef ze kommen.

Drëttens, mir yerbesseren d'Gouvernance. Den FNR ass en Établissement public an en ass souwuel op finanziellem, administrativem wéi och wëssenschaftlechem Plang autonom. Mir ënnerstëtze selbstverständlech dës Autonomie vum FNR, ënnerstëtzen awer och déi Garantien, déi solle sécherstellen, datt Autonomie a Responsabilitéit Hand an Hand ginn. Den FNR kritt vill ëffentlech Gelder zur Verfügung. Et ass legitim ze wëssen, wat domat geschitt.

D'Relatiounen tëschent dem FNR an dem Stat ginn iwwer pluriannuell Konventiounen geregelt, déi vergläichbar si mat de Contrats de performance. Dat ass net nei, ech hat jo schonn um Ufank vu menger Ried och vun der ganz rezenter Konventioun geschwat.

D'Organes de gouvernance ginn nei definéiert. Am Conseil d'administration sëtzen nëmme méi extern Spezialisten, déi opgrond vun hirem Experienz a Kompetenz ausgesicht ginn. D'Vertrieder vun deene verschiddene Ministère sinn net méi am Conseil. Duerfir ass awer nei derbäi e Commissaire du Gouvernement, a mir fannen dat och richtig an och noutwendig, datt esou ee Kommissär un de Réuniounen deelhält, och wann en nëmme eng Voix consultative huet.

(**M. Mars Di Bartolomeo reprend la présidence.**)

Mat dësem Gesetz stärke mer d'Positioun vum Generalsekretär vum Conseil d'administration. Op dësem Poste wäert an Zukunft deen nach méi staarken Mann oder déi nach méi staark Fra vum Conseil sëtzen.

À propos Mann oder Frau: Mir hu jo an dësem Gesetz och festgeschriwwen, datt all Sexe muss mindestens zu 40% am Conseil vertrauede sinn. Dat war zwar en zimlechen Hin an Hier, mä en attendant eng gesetzlech Regelung vun der Madame Ministesch vun der Chancëgläicheit, déi en allgemenggültige Charakter fir all staatlech Institutiounen huet, ënnerstëtzt déi gréng Fraktioun dës Démarche ausdrécklech.

Bleift dann nach de Conseil scientifique, un deem senge Missiounen sech eigentlech näischt Wesentleches ännert, wou just keng Bénéficiaire vun den Hëlfelezen méi därefen dra sinn,



Chambre des Députés

Compte rendu officiel

Supplément commun aux quotidiens:

Luxemburger Wort, Tageblatt, Lëtzebuenger Journal, Zeitung vum Lëtzebuenger Vollek

Contenu rédactionnel:

Service du compte rendu de la Chambre des Députés
Service des relations publiques de la Chambre des Députés
Tél. 466 966-1

Conception, saisie de texte et mise en page:

Espace Médias SA / Polygraphic SA, Differdange

Concept et coordination générale:

BRAIN & MORE, agence en communication, Luxembourg

Imprimeries

Saint-Paul Luxembourg s.a. 2, rue Christophe Plantin L-2988 Luxembourg, Editpress s.a. 44, rue du Canal L-4050 Esch-sur-Alzette

wat am Interessi vun der Transparenz vun den Décisionnen natierlech richtig ass.

Véiertens, et gi sougenannt „kollektiv“ Hëllef fir d'Formation-Recherche agefouert, eng Measure, déi mer guttheeschen, gradesou wéi och d'Fonctionnarisation vun den aktuellen Employés d'État am Département Recherche et Innovation vum Héichschoulministère.

Bleift nach ee Punkt, fir dee mer bis elo nach keng nohalteg Léisung fonnt hunn a wou mer och net allze vill optimistesche sinn, datt den FNR eng grouss Hëllef ka ginn: Am Beräich vun den Erzéiungswëssenschaften an an de gesellschaftspolitesche Froen oder Erausforderungen, wéi zum Beispill der multikultureller Zesummesetzung vun eiser Populatioun, oder an der Fuerschung vun eiser rezenter Geschicht sinn d'Fortschrëtt net esou däitlech wéi an anere Beräicher. Dat geet ënner anerem och aus der zweeter externer Evaluatioun vun eiser Uni ervir. Dës Branchen hunn do mat enger Note „bien“ däitlech manner gutt ofgeschnidde wéi zum Beispill den Droit, d'Luxembourg School of Finance oder d'Biomedezin.

Firwat datt mer mengen, datt och vum FNR vläicht dee Problem net nohalteg ka geléist ginn? Majo, et ass einfach d'Zesummesetzung vum Conseil d'administration vum FNR. Déi léisst drop schléissen, datt d'Akzenter vun der Fuerschung éischter op Sujete fokusséiert ginn, déi als ekonomesch méi relevant betruecht ginn.

Ech wëll duerfir nach eng kéier un e Passage aus dem Regierungssaccord erënneren, wou et heescht, datt d'Recherche och soll dozou bäidroen, Léisunge vun aktuelle gesellschaftleche Problemer ze fannen, sief et am Beräich vun der Education, der Integratioun, dem sozialen Zesummenhalt oder dem Erhalt vun der Umwelt.

An domat bréngen ech den Accord vun der grénger Fraktioun zu dësem Projet an ech soen lech Merci fir Är Opmierksamkeet.

► **Une voix.**- Très bien!

► **M. le Président.**- Merci och dem Här Adam. Nächste Riedner ass den Här Fernand Kartheiser.

► **M. Fernand Kartheiser (ADR).**- Här President, Dir Dammen an Dir Hären, nodeem ech déi puer Interventiounen de Mëtteg nogelauschtert hunn, wëll ech eigentlech net déi Ried halen, déi jiddweree scho gehalen huet, andeem en e bëssen op dat Gesetz agangen ass a widderholl huet, wat am Gesetz steet, an dat e bëssen esou kommentéiert huet. Mä ech mengen no deem, wat mer héieren hunn, ass et wichteg, och nach e puer Considérationen derbäizemaachen.

Éischtens wëll ech ufänken, fir dat och net ze vergiessen, mat engem grousser Merci un de Rapporteur, deen et méi wéi verdéngt huet, fir säi mëndlechen a schrëftleche Rapport. An ech wëll gläich ufügen, datt et normal a wichteg ass, datt mer eis Fuerschungslandschaft hei zu Lëtzebuerg regelméisseg iwwerpräiwen, och duerch extern Avisen, awer datt mer dann och musse vläicht kucken, wem mer dee Rôle uvertrauen.

Ass et richtig, d'OECD ze froen? Ass et richtig - ech weess net, wat d'Justificatioun war -, fir deen oder dee Cabinet d'experts zu Paräis ze beoptragen? Hätte mer net och missen Avisen hu vu groussen Acteuren an der Fuerschungslandschaft selwer, wéi engem Conseil national de la recherche scientifique, vu Fraunhofer, vu Max-Planck an aneren, déi awer en anere Bléckwénkel hunn an eng aner Expertise nach hätte kënnen erabréngen wéi elo just eng OECD. Dat ass emol eng éischt Fro, déi ech an de Raum wëll stellen.

Ech weess net, ob den Här Minister mech héiert, mä vläicht, wann en herno eng kéier nolauschtert, da kënne mer dann och an der Diskussioun dorop agoen. Mä ech hunn d'Hoffnung bal haut opginn, datt den Här Meisch nach nolauschtert. Ech waarde just... Ah voilà, ech mengen, entschëllegt, Här Minister, mä ech hat gehofft, Dir géift mer nolauschteren.

► **M. Claude Meisch, Ministre de l'Enseignement supérieur et de la Recherche.**- Ech lauschteren lech no!

► **M. Fernand Kartheiser (ADR).**- Majo, dat ass schéin. Gutt!

Déi zweet Bemierkung, déi ech wollt maachen, dat ass, datt, nodeem mer hei eng Diskussioun haten, dann d'Fro ass: Wat ass eigentlech d'Verhältnis tëschent Politik a Fuerschung? Wat si legitim Fuerderunge vun der Politik? A wat sinn illegitim Fuerderunge vun der Politik, op jidde Fall emol méi problematescher?

Legitim ass et sécher, wa mer gär e Return on investment hätten. D'Valorisation vun der Recherche scientifique an hire Resultater, déi och an dësem Gesetz ugeschwat gëtt, ass sécher legitim. Do si jo och e puer Acteuren hei am Land, déi sech zum Beispill ëm Start-upe bekëmmern. An ech mengen, datt musse mer och konsequent fuerderen, Flexibilitéit do eranzebréngen, souwäit et nëmme geet, fir do och mam Ausland an eisen Haaptkonkurrenten an deem do Beräich wierklech kënne matzhalen.

Ech mengen, do musse mer nach e Stéck Wee goen. Mir mussen eis och déi Secteuren erausichen, déi am krisesecherste sinn, wou mer d'Recherche kënnen esou ëmsetzen, datt se och méi laangfristeg Retombée fir eis Economie huet. Also legitim: de Return on investment.

Dat Zweet, wat och a mengen Ae legitim ass, ass, datt mer fir d'Visibilitéit vun eiser Fuerschung suergen, fir datt och Lëtzebuerg bekannt ass als e Land, wat dann d'Fuerschung ënnerstëtzt. Do kann ee sech heiansdo d'Fro stellen: Gëtt dat genuch gemaach?

Ech huelen als Beispill dat neit Max-Planck-Institut, wat jo vun eis finanzéiert gëtt. Mä wou schaffen déi Chercheuren? Sinn déi net dacks am Ausland? Sinn déi sech bewosst, datt se vu Lëtzebuerg bezuelt ginn? Wat ass d'Retombée fir Lëtzebuerg en termes de visibilité vun deene Chercheuren, déi dann do schaffen?

Dat sinn awer Froen, déi, mengen ech, och legitim sinn. Well wa mir hei schonn esou Investitiounen maache wéi zum Beispill d'Max-Planck-Institut, dat mer elo hei ufänken, da muss och garantiéiert sinn, datt do och an der Communauté scientifique internationale Lëtzebuerg als Wëssenschaftsstanduert identifizéiert gëtt an datt net nëmme gesot gëtt: „Hei, dat ass en däitscht Institut zu Lëtzebuerg“, mä och déi Lëtzebuenger Identitéit vun deem Institut da kloer erausgestrach gëtt.

Dat sinn also legitim Considérationen an der Wëssenschaft.

An da gëtt et awer problematesch. Mir hunn zum Beispill, wa mer froen: „Wéi eng Wëssenschaft soll da gemaach ginn an a wéi enge Rahmbedéngungen?“, mir hunn dat elo net hei diskutéiert oder nach net vill diskutéiert. D'Spriecherin vun der LSAP huet gesot, d'Fuerschung an d'Entwécklung misste sech un d'Besoinne vun der Gesellschaft upassen. Dat ass eng Deelwourecht.

D'Wëssenschaft ka sech net dorobber limitéieren. Si ass net, wéi dat hei ka gelies ginn, e Sujet vun engem, oder Objet vun engem totalen Utilitarismus. An der Wëssenschaft muss et Plaz gi fir Initiativ, et muss Plaz gi fir Grondlagefuerschung, och ëmmer méi hei zu Lëtzebuerg,

well mer eis awer an eng aner Kategorie erabewege lues a lues. Et kann net nëmmen eng Recherche appliquée sinn op Zäit.

An et muss gekuckt ginn, no wéi engen ethesche Kritären déi Wëssenschaft dann hei am Land fonctionnéiert. Mir haten nach viru Kuerzem geschwat vun enger wichteger ethescher Komponent a verschidde biomedezinesche Beräicher. Mir däerfen och do net hannendrubleiwien.

Also, d'Wëssenschaft dierf net d'Sklavin vu gesellschaftleche Besoinen sinn, mä si muss an hirem eegene Wäert, an hirer eegener Entfaltungsméiglechkeet respektéiert ginn. Wéi gesot, mir sinn hei an engem Spannungsverhältnis tëschent deem, wat mir eis kënnen erwaarden als Stat duerch eise Finanzement, an deem, wat mer awer och u Respekt musse bréngen virun der Fräiheet an der Onofhängegkeet vun der Wëssenschaft.

Mir haten och kuerz geschwat - ech mengen, den Här Adam hat dat rappeléiert - iwwert déi gesellschaftspolitesche Froen, déi och op der Uni Lëtzebuerg diskutéiert ginn. Mir mussen oppassen, och op der Universitéit, datt d'Universitéit an déi Fuerscher, déi do schaffen, net zu engem verlängerten Aarm vu Ministère ginn, net schaffen - zum Beispill an Ärem Beräich, an engem anere Beräich, an der Education - praktesch als subventionéiert Fuerschungsinstitut, dat fir e Ministère schafft an dann och d'politesch Ziler vun deem Ministère iwwerhëlt oder mat formuléiert. Dat ass net den Objet vun der akademescher Onofhängegkeet vun enger Universitéit.

An och do, mengen ech, si mer op e Wee gaangen, dee vläicht net dee richtigen ass a wou ee muss och vun der Pädagogik op der Universitéit oder vun anere vun deene Beräicher erwaarden, datt se sech hirer Onofhängegkeet, hirer akademescher Onofhängegkeet géintwuer eiser Regierung bewosst sinn, quitte datt natierlech eng finanziell Bréck do besteet.

Nach zwou aner Bemierkungen, déi vläicht och vum Statsrot opgeworf gi sinn. Déi éischt, déi ass och vum Statsrot opgeworf ginn an déi ass seriö: Mir liewen an engem ganz klengen Land. An an engem ganz klengen Land kann ee wierklech duerch déi Méiglechkeet, déi an dësem Gesetz geschaf gëtt, nämlech datt Asblen och kënne bezuelt gi fir Fuerschungsaarbechten, datt se kënne subventionéiert ginn, an e Genre Subventionungsklientelismus erarutschen. Déi Angscht gëtt bei mir nach bestärkt, zënter datt ech héieren hunn, datt déi gréng Kollegen dat ganz gutt fannen. Dat ass fir mech kee ganz positivt Zeechen.

Ech géif warnen do virdrun, fir wierklech elo hinzugeen an déi Asblen do als e ganz wichtigen Usprichpartner fir eis wëssenschaftlech Hëllef ze gesinn, well dat risquéiert, an déi do Richtung ze goen. Et wär besser, wierklech ze probéieren, op engem héijen Niveau wëssenschaftlech Aarbecht, Fuerschung ze bedreiwen, wéi do an e Lëtzebuenger „Klengkleng-Subventionungsklientelismus“ eranzurutschen. Déi Gefor ass op jidde Fall reell, an ech sinn dem Statsrot dankbar, datt en déi opgeworf huet.

Déi zweet Bemierkung, dat sinn déi Quoten, déi jo iwwerall hei grouss Begeescherung ausgeléist hunn. Ech wëll elo net d'Positioun vun der ADR iwwer Quote widderhuelen. Dir kennt se. Mä ech wëll déi vun der DP vläicht kuerz virlesen.

Dat ass an enger Zeitung. Wësst Der, op mengem Schreifdësch läit vill, an ech hunn do eng „Femmes Magazine“ vum Oktober 2013 leie gehat. Do liesen ech elo, wat eng eminent Kolleegin, Är Kolleegin aus der Regierung, d'Madame Maggy Nagel, gesot huet: «Le DP se prononce contre l'introduction de quotas. En tant que parti libéral, nous sommes d'avis que ce n'est pas le sexe, mais plutôt la formation et les qualifications professionnelles d'une personne qui doivent être déterminantes.»

A wou d'Demokratesch Partei recht huet, huet se recht! Also, do kënne mir als ADR nëmmen „Bravo!“ soen. Et ass och eis Positioun. Mä et wunnert eis, datt Dir déi Positioun einfach esou opgitt! Dir hutt déi jorelaang verdeedegt.

Ech hunn och elo net héieren, datt Dir am Starter Schäfferot, wou elo nach ee Mann an ech weess net wéi vill Damme setzen, een Här an ech weess net wéi vill Dammen, datt Dir elo do wëllt Quoten aféieren am Stater Gemengerot.

Dat ass einfach: Déi Quotendiskussioun ass eng onsënneg Diskussioun! Mir sollte kucken - wéi et och am Sënn vum Gesetz ass -, datt mer qualifizéiert Leit kréien, wou d'Geschlecht vollkommen egal ass, mä datt mer gutt, déi bescht Leit kréien. An déi solle mer huelen, ob Fra oder Mann ass komplett egal.

An ech verstinn all déi Parteien net, déi engersäits eis wëllen erklären an anere Politik-

beräicher, do, wou et se arrangéiert, datt dat Geschlecht nëmmen e soziaalt Konstrukt ass, datt et iwwerhaupt kee biologesch Geschlecht ausser äusserlech Geschlechtsmerkmalen gëtt. Do ass et dann nëmmen e soziaalt Konstrukt. Wa mer awer hei an dëse Beräich kommen, ass et op eemol determinant, fir Posten ze kréien! Do ass einfach eng Kontradiktioun.

Net nëmmen, datt mir déi ganz Quotendebatt als onsënneg emfannen an diskriminatoresch géintwuer deene Fraen, déi sech herno als Quotefrae fillen, dacks zu Onrecht, mä virun allem ass et och inkohärent, well déi lénk Parteien déi eng kéier d'biologesch Geschlecht relativéieren an et dann an anere Gesetzer, wann et hinnen da passt, zu engem determinante Kritär vun hirer Politik erhiewen. Déi ganz Diskussioun ass komplett onsënneg.

Anescht wéi d'DP bleiwe mir awer bei eiser Positioun a mir wäerten och laangfristeg do recht kréien.

E leschte Kommentar iwwert d'Quoten, do kann een nach vläicht soen: Wësst Der, déi grouss Gefor dohannert, bei all deenen do Saachen, souwuel bei dem Usproch vum totalen Utilitarismus vun der Wëssenschaft, deen d'LSAP haut hei erhiewen huet, wéi och bei de Quoten, do ass eng Gefor hannendrun, an dat ass d'Politiséierung vun der Wëssenschaft!

Mir kënne mat dësem Gesetz an allgemeng an eiser Politik net higoen, fir wierklech déi gesellschaftlech Uspréich an d'Wëssenschaft esou wäit ze dreiwien, datt mer d'Wëssenschaft politiséieren. Dat dierf net sinn! An ech mengen, eis Verantwortung ass och do, fir kloer Grenzen ze hunn. Dat géllt souwuel fir déi Asblen, et géllt bei de Quoten, et géllt beim Utilitarismus, et géllt beim Return on investment. Mir hunn einfach en Devoir de retenue als Politik, wa mer iwwert d'Wëssenschaft schwätzen a wa mer mat hir ze dinn hunn.

Dat gesot, Här President, Dir Dammen an Dir Hären, soen ech lech villmools Merci fir Är Opmierksamkeet. Aus all deene Suergen, déi ech elo hei konnt virbréngen, wäerte mir eis enthalten. Mir fannen et ganz schéin, ganz richtig, ganz gutt, datt mer d'Wëssenschaft hei am Land fuerderen, och iwwert de Fonds National de la Recherche, datt mir se féerden a fuerderen, awer mir hu vill Suergen an dësem Beräich, och Suerge mat dësem Gesetz, an duerfir kënne mir net derfir stëmmen. Mir enthalten eis.

Villmools Merci!

► **Une voix.**- Très bien!

► **M. le Président.**- Nächste Riedner ass den Här Justin Turpel, deen och scho prett ass.

► **M. Justin Turpel (déi Lénk).**- Merci, Här President. Ech brauch d'Wichtegkeet vun der Recherche hei net ze ënnersträichen, an zwar net nëmmen als Recherche, fir der Wirtschaft ze dengen, an net nëmme fir dat, wat en direkten Impakt fir d'Economie soll hunn. D'Fuerscher hunn et net ëmmer einfach. Si haten et net ëmmer einfach an der Geschicht a si hunn et haut och nach net ëmmer einfach. Duerfir wëll ech op véier Punkten agoen.

Deen éischten ass ebe just dee vun dem Risiko vun der Fuerschung. Eng Fuerschung kann net ëmmer en direkt Resultat hunn, e faassbart Resultat hunn. D'Fuerschung ass risikoräich, net nëmme fir déi Leit, déi doranner schaffen, mä och fir d'Projeten u sech. Dat stëmmt grad fir jonk Fuerscher, déi sollen ugereggt ginn, fir och a riskante Beräicher Fuerschung ze bedreiwen.

D'Meenung, eng Fuerschung misst sech ëmmer direkt lounen, ass einfach falsch. Ech wëll einfach d'Beispill gi vun Amerika, wou d'Meenung déi ass, datt, wa vun honnert Fuerschungsprojeten een eppes gëtt, dann huet dat sech rentéiert. Dann huet dat sech rentéiert, an et ass net dat ëmgedrëit Verhältnis, wat muss sinn.

Den zweete Punkt, deen ech wëll opwerfen, ass deen, deen hei ugeschnidde ginn ass souwuel vum Vertrieber vun der LSAP wéi vun de Gréngen: d'Zilsetzung vun der Fuerschung. Mir hunn effektiv, an dat gëtt mer ze denken, am Projet de loi, am Exposé des motifs drastoen, datt dat soll gemaach ginn, wat en direkten ekonomeschen Impakt huet. En direkten ekonomeschen Impakt heescht: fir d'Wirtschaft, fir d'Betriber, fir d'Konzerner. An ech mengen, et ass virdrun, an ech wëll dat och ënnersträichen, ausdrécklech do virdru gewart ginn.

Den utilitaristesche Charakter vun der Fuerschung, dee muss een a Fro stellen, an och de breede Charakter, dee muss garantiéiert sinn. An der Fuerschung muss een och kënnen Themaen uschneiden, déi net direkt der Wirtschaft



eppes bréngen, mä déi gesellschaftleche Méiwäert schafen. Ugeschwat ginn ass den Erzéiungsberäich, ugeschwat ginn ass d'Sozialfuerschung, ugeschwat ginn ass och d'gesellschaftlech Fuerschung am Beräich vun Demokratie.

An ech kann den Här Kartheiser berouegen: Déi Leit, déi an deem Beräich fuerschen a schaffen, déi wäerte sech dergéint wieren, fir e politeschen Aarm ze gi vu Ministèreen a vu Ministerialbeamten. D'Onofhängegkeet vun de Fuerscher ass och an deene Beräicher eng absolut Viraussetzung, déi ee muss respektéieren.

D'Zilsetzung vun der Fuerschung ass net nëmmen d'Fro vun net ze vill utilitaristeschen a breet gefächert, mä ass och d'Fro vun der Recherche appliquée a vun der Recherche fondamentale, well ganz dacks de Pendel vill ze vill op d'Säit vun der Recherche appliquée fält, wat och eppes ze dinn huet mat de Fuerschungsberäicher, ëm déi et geet.

An da soll een zwéin Aspekter net vergiessen, déi bei der Fuerschung eng Roll spille mussen. Dat éischt, dat ass deem och vun der Vulgariséierung vun der Fuerschung a vun de Fuerschungsergebnisser, fir déi an d'Gesellschaft eranzebréngen. Och dat ass eng Préoccupatioun vun der Fuerschung, déi net soll op der Säit gelooss ginn, well nëmmen doduerjer kritt se hire breedend Effet an nëmmen doduerjer kritt se en Impakt an der Gesellschaft op enger breeder Basis.

Deen zweeten Aspekt, deem een net soll aus den Ae verléieren, dat ass, mir schwätze jo net nëmme vu Fuerschung, mä mir schwätze vu Recherche et Développement. Dat ass de ganzen Développement, d'ganz Entwécklung vun deem, wat sech hannendrun ergëtt vun Implikatiounen, vun deem, wat dat un Ëmsetzung, vun deem, wat dat a konkrete Projekte mat sech bréngt, erëm eng Kéier net nëmmen a wirtschaftlecher Hisiicht, mä och a gesellschaftlecher Hisiicht.

Déi zwéin aner Punkten, op déi ech kuerz wëll agoen: Dat eent ass dee léidege Problem, dee mer an deem Projet de loi hei net léisen, dat ass d'Situatioun vun der Prekariséierung, vun der Planungsunsécherheet vun de Chercheuren doduerch, dass si am Fong déi eenzeg Kategorie vu Salarié sinn, deene mer e Contrat à durée déterminée vu 60 Méint, vu fënnf Joer zousummen, wëssend - mä ech hu keng Chiffere, ech weess net, ob de Minister eis se haut ka ginn oder ob mir iwwer eng Question parlementaire déi sollen norechen -, dass et awer interessant wier, fir emol gewuer ze ginn: Wéi laang sinn déi Projeten, déi déi verschidde Chercheure kréien? No deem, wat ech héieren hunn, sinn dat meeschten zwee bis dräi Joer, de Maximum ass jo fënnf Joer.

Mä do stelle sech eng ganz Rei Froen vun Onsécherheet. Wat ass d'Planungssécherheet, déi e Chercheur kann hunn, deen eng Famill wëllt hunn, wann en ëmmer esou limitéiert ass? Dat féiert dozou, an ech mengen, elo an dem leschten „Forum“ vum Abrëll 2014 steet nach e flotten Temoignage iwwert: Wéi soll ech do eng Famill ernähren? Selwer schold! Oder: Huet een net besser, et géif ee sech räich bestueden oder räich ierwen? Oder: Solle mer d'Wëssenschaft net erëm an d'Klouschter setzen, wou se CDien hunn?

Also, dat sinn trotzdeem eng ganz Rei berechtigt Froen, bis hin zu der Situatioun vu Fraen, an dat gëtt et ganz konkret, déi, well se schwanger sinn, net méi hire Kontrakt verlängert kréien, oder Schwangerschaft, well aner Leit op de Projet gesat si ginn.

Ofgesi vun der Fro: Wat maache mer an deene Projeten, déi iwwer fënnf Joer daueren? Well där gëtt et och. Gi mer deenen dann en CDI, deen een nom Gesetz misst huelen, oder huele mer deen Nächsten an der Rei, fir déi Fuerschungsaarbecht weiderzeféieren?

Also, mir sinn a kenger ganz gudder Situatioun, wat d'Planungssécherheet a wat d'sozial Ofsécherung vun de Chercheuren, haaptsächlech jonke Chercheuren ugeet.

An dee leschte Punkt, deem ech wëll opwerfen, ass en ähnlechen Punkt, dee sech ergëtt aus dem Gesetz vum 2008, deem am Règlement grand-ducal festgeschriwwen ass iwwert d'Aides financières. Dat ass dee vun der Clause de mobilité, déi Clause de mobilité, déi mir de Postdoktoranden imposéieren doduerch, dass mer verlaangen, dass se an aner Länner ginn. Dat mutt einfach un, déi Obligatioun, wéi eng relativ administrativ Oplag, déi einfach u sech näischt direkt mat der Realitéit ze dinn huet, aus zwou Considératiounen eraus.

Déi éischt Considératioun ass déi: Et gëtt Situatiounen, och Familijsituatiounen mat Kanner, wou een net kann dat maachen. Déi Leit, déi kommen dann net an de Benefiss vun den Aide-financières, déi se awer bräichten.

An dat Zweet ass - an dat ass dat, wat een, mengen ech, haaptsächlech soll considéréieren -, dass d'Fuerscher selwer an engem Ëmfeld liewen, wou souwiesou eng immens Mobilitéit an en immensen Austausch besteet, dee vläicht formal net esou formaliséiert ass, wéi dat hei verlaangt ass, mä deen awer sécherlech méi reell ass, wéi wann ech elo künstlech während enger gewësser Zäit vu Lëtzebuerg, vun der Uni Lëtzebuerg op Tréier, op d'Uni Tréier ginn. Also ech mengen, dass schonn den Austausch vill méi villfältig ass, wéi dat ugeholl gëtt.

Do wier et sënnavoll, wann ee géif effektiv e Bilan maache vun der Clause de mobilité an dat iwwerdenken. An do ass et d'Initiative gouvernementale, well et ass e Règlement grand-ducal, deem dat kann änneren.

Déi Saachen do gesot, wëll ech also trotz verschiddenen Zweifelen, déi ech um Projet de loi hunn, hei den Accord gi vun eise Grupp, eiser Fraktioun zu dem Projet de loi, inklusiv zu de Quoten, déi mer onbedéngt esou laang musse bäibehalen, wéi mer Leit hu wéi den Här Kartheiser, déi sech aus hiren Ursachen do dergéint wieren.

Op aner Froen sollte mer sécherlech zrëckkommen, wéi déi vun der Ausrichtung vun der Fuerschung. Ech hoffen, dass de Minister deem, wat och d'Verrieder vun der LSAP a vun deene Gréngen hei gesot hunn iwwert d'Ausrichtung vun der Fuerschung, kann zoustëmmen, ausdrécklech kann zoustëmmen. Well dat schéngt mer e wichtegen Punkt ze sinn, op dee mer mussen zrëckkommen, och wann d'Zusummesetzung vum Conseil d'administration deem net onbedéngt Rechnung dréit.

Ech wier dann och frou, wa mer op d'Fro vun de Contrats à durée déterminée vläicht an engem anere Kontext, wou dat misst diskutéiert ginn - an d'Regierung selwer och iwwert d'Clause de mobilité - kéinten zrëckkommen.

Ech soen Iech Merci.

► **M. le Président.** - Merci och dem Här Turpel. Domat si mer um Enn vun der Diskussioun ukomm an d'Wuert huet d'Regierung, den Här Héichschoul- a Fuerschungsminister.

Prise de position du Gouvernement

► **M. Claude Meisch,** *Ministre de l'Enseignement supérieur et de la Recherche.* - Här President, Dir Dammen an Dir Härren, fir d'Alileréisch wëll ech all den Intervenanten hei Merci soen. Mir hunn eng breet, net déi maximal breet Zoustëmmung, mä awer eng breet Zoustëmmung fir deen Text hei an, ech mengen, och fir eng Rei vu grondleeënden Iwwerleeungen, wat d'Ausrichtung vun der Fuerschungspolitik hei zu Lëtzebuerg ubelaangt. Dass déi awer e breede Konsens hei am Haus fonnt huet, dat huet een de Mëtteg hei am Laf vun der Debatt nach eng Kéier eraushéieren.

E spezielle Merci géif ech ganz gär dem Rapporteur, dem André Bauler ginn. Hien huet deen Dossier zesumme mat mir am Ministère kennegeleiert an en huet säin Abléck, deen en do kritt huet, mat eriwuer, mat deem Fachwësse mat eriwuer an d'Chamber bruecht, an ech mengen, dat huet en de Mëtteg hei nach eng Kéier ganz kloer ënner Beweis gestallt.

Ech muss opgrond vu sengem Rapport, opgrond awer och vu villen aneren Interventiounen, déi nach eng Kéier op de Fong vum Text agaange sinn, net méi nach eng Kéier erklären, wat an deem Gesetz hei steet. Ech wëll awer nach eng Kéier rappeléieren - et ass awer och vun eenzelne Virriedner ugefuert ginn -, op wat fir eng dynamesch Aart a Weis sech d'Fuerschungslandschaft hei zu Lëtzebuerg an de leschte 15 Joer, also zanterdeem de Fonds National de la Recherche gegrënnt gouf, entwéckelt huet.

Déi Gelder, déi mer an d'ëffentlech Fuerschung investéiert hunn, déi hu sech verzéngfacht. Mir hu vill méi Chercheuren haut zu Lëtzebuerg, mir hunn international ganz renomméiert Fuerschungsinstituter. A wa mer haut en neit Gesetz maachen a wa mer amgaange sinn, doriwwer eraus, nieft dësem Gesetz, och aner Gesetzer nei auszeriichten, da si mer jo och amgaangen, eis Fuerschungslandschaft fir déi nächst fofzéng Joer nach eng Kéier nei opstellen.

A wa mer eis elo emol virstellen, dass een och nëmmen eng deelweis comparabel Entwécklung iwwert déi nächst fofzéng Joer nach eng Kéier hätt, dann, mengen ech, hu mer dat erreicht, wat mer brauchen hei zu Lëtzebuerg, fir nämlech staark präsent an der Wëssenschaft ze sinn.

Jiddereen huet dat gesot a jiddereen huet et ënnerstrach, dass mer nëmme kënnen eko-

nomesche Wuelstand halen, dass mer och nëmme kënnen gesellschaftlech Problemer léisen, wa mer eis selwer druginn ze fuerschen, eis selwer druginn ze erkennen, dass mer doduerjer och e Stéck, eng Nueslängt viraus behalen. Dat ass, mengen ech, ee vun de groussen Opträg, deen d'Politik hei huet an dee se dann awer weidergëtt un aner Instanzen, wéi an dësem Fall un de Fonds National de la Recherche.

Mir mussen awer och wëssen, dass bei allen Efforten, déi mer och nach zousätzlech kënnen maachen an och wëlle maachen - an och dës Regierung wëll déi maachen -, dass mer eis awer musse cibléieren, dass mer grad als klengt Land mat engem Grapp voll Acteuren do net alles kënnen maachen, net op allen Terraine kënnen doheem sinn an dass mer dann awer scho solle kucken, do, wou mer fuerschen: Da kommt, mir kucken et awer do ze maachen, wou et eis awer e Stéck wäit bréngt!

Wa mer an der Economie zum Beispill soen, dass mer ICT-Standuert weider wëlle ginn, dass mer an der Biomedezin eis weider wëllen developéieren, nun, da läit et jo awer op der Hand, dass, wa mer Fuerschungsaktivitéiten zu Lëtzebuerg wëlle favoriséieren, dass mer et eben och grad an deenen Domänen do maachen, fir eng Vernetzung hinzekréien, fir dass mer den Transfer vun der Grondlagefuerschung, der ëffentlecher Fuerschung eran an d'Entwécklung vun neie Produiten, vun neie Prozesser, fir dass mer deen och besser hikréien, wéi mer dat an der Lescht vläicht konnte maachen.

Ech wëll awer nach eng Kéier kloer ënnersträichen, dass de Regierungsprogramm eng kloer Sprooch schwätzt an dass eigentlech fir d'éischte Kéier e Regierungsprogramm esou eng kloer Sprooch schwätzt, dass mer, wa mer Efforte maachen iwwert d'Fuerschung, dass mer déi net nëmme maachen, fir nei Betriber unzezéien, dass mer se net nëmme maachen, fir nei Aarbechtsplazen ze schafen, fir e Stéck wäit méi kompetitiv ze ginn, fir en Argument ze hunn, Betriber an eng ekonomesch Aktivitéit vläicht op Lëtzebuerg ze lackelen.

Neen, mir maache se och, well sech eng Rei vu grundsätzleche gesellschaftleche Froen hei zu Lëtzebuerg stellen, wou mer och en Input brauche vun der Fuerschung. An ech denken, dass mer do awer och déi Acteuren hei zu Lëtzebuerg an der Fuerschung sollen encouragéieren, eis do eng Hand mat unzepaken. Woubäi ech net wëll ausschléissen, dass d'Regierung an eenzel Ministèreen och emol eng Kéier ausserhalb vu Lëtzebuerg kucke ginn, fir do eng Etüd gemaach ze kréien. Mä eis Situatioun ass heiandsdo esou spezifesch, dass deen Know-how, deen een dofir bräicht, eigentlech ganz schwéier muss bei engem aneren opgebaut ginn, dee mer awer vläicht hei zu Lëtzebuerg da mëttlerweil hunn, well do d'Situatioun awer da méi no läit.

Dofir denken ech, dass mer gutt drun dinn, och eise Fuerschungsinstituter, virun allem och der Uni, mat op de Wee ze ginn, dass se och eng Aufgab an deem doten Domän ze spillen hunn, dass se bei gesellschaftleche Froen, wann et ëm d'Integratioun geet, wann et ëm eise Schoulsystem geet, wann et ëm d'Méi-sproochegkeet hei am Land geet oder ëm ganz aner Sujeten, dass se och do kënnen vun enger grousser Bedeitung sinn.

De Fonds National de la Recherche strukturiert eigentlech op eng exemplaresch Aart a Weis eis Fuerschungslandschaft. An et ass oft gesot ginn haut de Mëtteg hei: D'Politik kann net decidéieren, wou gefuerscht gëtt. An ech gesinn eigentlech och net eng aner Méiglechkeet, wéi dass een eben eng Agence huet wéi de Fonds National de la Recherche, deen d'Projeten evaluéiert.

Ech mengen net, dass een dat als Ministère ka maachen iwwer eng Administratioun. An ech mengen, dass et gutt ass, wann dat vun der Politik ewechgeréckelt ass, dass d'Politik vläicht d'Ziler definéiert, dass d'Politik och vläicht nach de Kader definéiert, dass se och de budgetäre Spillraum kann, virun allem vun der ëffentlecher Fuerschung, definéieren, mä dass innerhalb vun deem Kader, deen definéiert ass, awer do d'Fachwësse virun allem muss kucken: Wéi kréie mer dat am beschten ëmgesat?

An den FNR ass eent vun deene ganz wichtegen Instrumenter, fir eis Fuerschungslandschaft ze strukturéieren an och finalement mat ze decidéieren, wat da gefuerscht gëtt a wou vläicht Projeten dann awer net den Zilsetzunge gerecht gi si respektiv net de Qualitéitsuspréich gerecht gi sinn. Well dat ass och, mengen ech, ee vun deene ganz groussen Aspekter, déi bis haut schonn agehale goufen, déi awer mat dësem Gesetz nach eng Kéier gestärkt ginn, dass mer, wa mer fuerschen, dat op engem ganz héijen Niveau musse maachen, fir eis als Fuerschungsstanduert weider ze positionéieren no baussen.

Héich qualitativ Fuerschung hei zu Lëtzebuerg, déi strahlt och no baussen an zitt weider héich qualitativ Acteuren an d'Land un - eppes, wat mer jo onbedéngt wëllen. An et muss ee jo awer och kucken, dass et net nëmmen drëms geet, hei Geld ëmzedréien. Et geet finalement awer och drëms, eppes doduerjer ze errechen an eppes a Bewegung ze bréngen.

Bon, dat Gesetz hei, an et ass oft widderholl ginn, baséiert sech op eng Rei vu groussen Pisten. Et ass eigentlech insgesamt d'Upassung vum Fonctionnement vum FNR en fonction vun der Entwécklung vun der Fuerschungslandschaft an deene leschte fofzéng Joer. Opgrond vun der Entwécklung awer och, déi den FNR eigentlech selwer scho matgemaach huet, ouni dass et tel quel am Gesetz stoung, ass villes, wat haut schonn am FNR geschitt, elo mat iwwerholl ginn an dësem Gesetz.

D'Gouvernance selwer vum FNR ass nach eng Kéier op de Leescht geholl ginn, wou d'Indépendance virun allem nach eng Kéier gestärkt ginn ass. Et ass nach eng Kéier méi staark cibléiert ginn, wat d'Bénéficiairen ubelaangt. Mir hunn och nach eng Kéier en Elargissement gehat vum Instrument vun der Aide à la Formation-Recherche, déi dann och op Kollektivitéite kann ausgeweit ginn.

An et gëtt nach eng Kéier e ganz staarken Akzent gesat op déi Initiativen, déi de Fonds National de la Recherche an de leschte Jore ganz besonnesch geholl huet, nämlech fir d'Culture scientifique hei zu Lëtzebuerg ze stäerken. An ech mengen, dass musse mer maachen. Ech selwer hunn deen Domän elo virun enger Rei vu Méint entdeckt. A wéi villen anere Lëtzebuerger ass et mir gaangen: dass ech grouss Ae gemaach hunn. Well vill aner Leit hei am Land, déi wëssen net, wat an deene Fuerschungszentren geschitt, wien do tätég ass, op wat fir engem Niveau do geschafft gëtt.

Vill Leit komme vun der Uni a wëssen eigentlech och nach net, dass Fuerschung an e Fuerscher ze ginn zu Lëtzebuerg eng reell Alternativ mëttlerweil ginn ass. Déi Zäit, wou meng Generatioun vun der Uni komm ass, do war dat eigentlech och net esou. Do hat een net déi dote Chance. Haut ass et awer esou, mä et wëssen nach ganz vill Leit et net. An ech mengen, dass mer do e kohärent Konzept nach eng Kéier mussen entwéckelen, bei deem den FNR och e wichtegen Acteur ass an der Ëmsetzung, fir d'Fuerschungsaktivitéite bei d'Leit ze droen am Land, fir dass mer verstinn, wat do geschitt.

Et geet och do eigentlech finalement ëm eng politesch Akzeptanz. Wa mer hei wëllen decidéieren - an ech hunn de Mëtteg keen héieren, deen de Contraire gesot huet -, dass mer nach méi Geld wëllen an déi ëffentlech Fuerschung investéieren, da musse mer kucken, dass dat matgedroe gëtt am Land.

Et geet awer och drëms, fir den Interessi un der Matière schonn och relativ fréi bei Kanner, bei Jugendlechen, bei jonke Leit ze stimuléieren, well wa mer keng jonk Leit hunn, déi virwëtzeg sinn, déi wëlle siche goen, déi wëlle Froen beäntwerthen, da wäerte mer och keng nächst Generatioun vu Fuerscher kréien. A bis ewell ginn an de Fuerschungsinstituter hei am Land ganz vill verschidde Sprooche geschwat an et gëtt weenig Lëtzeburger geschwat. Mir hunn et effektiv do nach net fäerdegbruecht, jonk Leit hei vu Lëtzebuerg ze motivéieren, och an deen doten Zukunftssektor hei am Land eranzugeen. Dat ass dofir, mengen ech, wierklech eng vun de ganz groussen Erausforderungen, déi net nëmme virem FNR leien, mä fir déi déi gesamt Politik, och d'Éducation nationale, sech do nach muss méi staark ustrengen.

Dat heiten ass net deen eenzege Gesetzesprojet, mat deem mer probéieren, eis Fuerschungslandschaft nei ze strukturéieren. Mir hunn eng Fusioon vun zwee wichtegen Acteuren, dem Centre de recherche public Gabriel Lippmann an dem Henri Tudor, déi virun der Dier steet, déi den 1. Januar 2015 soll a Kraaft treden, déi zënter Längerem och esou preparéiert ginn ass.

Mir hunn e Gesetzesprojet nach an dësem Haus leien iwwert d'Universitéit, an deem, wann een awer elo kuckt, wat fir e Wee inhaltlech dee Gesetzesprojet gemaach huet, eigentlech net méi vill drasteet. An ech denken, dass een dofir awer nach eng Kéier sech Zäit soll huelen an dass d'Regierung dat soll maachen, och d'Parlament dat soll maachen a vläicht d'Uni och selwer: fir driwwer nozedanken, ob mer, wa mer wierklech un d'Gesetz gi vun der Uni, ob mer net dann nach eng Kéier méi grundsätzlech sollen driwwer nodenken.

Mir wëssen, dass d'Uni och den 1. Januar 2015 en neie Recteur kritt. Mir wëssen, dass mer nei Kontrakter mat der Uni a mat de Fuerschungszentren gemaach hunn, déi bis 2017 solle lafen, dass mer och do gesot hunn, dass an der Mëtt nach eng Kéier e Break ka gemaach ginn, fir nei ze verhandelen an och



vläicht eng nei Ausrichtung ze kréien, datt also och virun allem d'Joer 2015 e wichtegt Joer ass, e Reflexionsjoer virun allem och soll si fir dee ganzen Domän Héichschoul a Fuerschung hei zu Lëtzebuerg, wou mer nach eng Kéier grondsätzlech Froe sollten diskutéieren.

An ech hätt eigentlech léiwer, datt mer dee legislative Prozess vum Gesetz vun der Uni eréischt da géife weiderdreien, well dann hätte mer vläicht eng aner Vue op d'Struktur vun der Uni Lëtzebuerg - wéi se da fir d'Zukunft soll sinn - wéi mer dat haut hunn, wou mer eng Rei vun Äntwerten nach net hunn.

Et ass vu ville Riedner ugemierkt ginn, an ech mengen, datt dat eng Evidenz ass, datt et bei der Fuerschung net nëmmen drëms geet, datt mer Geld verdeelen, mä datt mer et richtig verdeelen, fir datt et eben do ukënnt, wou et am sënnavollste verdeelt ass. An et ass jo eigentlech dat och eng zentral Aufgab vum Fonds National de la Recherche.

Et ass och ugeschwat ginn, ob mer a puncto Gouvernance, net vum Fonds National de la Recherche, mä vun der ganzer Fuerschungspolitik eigentlech zu Lëtzebuerg, ob mer do richtig opgestallt sinn, virun allem och am Fuerschungsministère. De Claude Adam huet déi Fro hei an de Raum gestallt.

Bon, et fält schonn op, datt mer e Ministère si mat grouse Budgeten, awer mat klengem Staff, well mer staark Acteuren natierlech ronderëm hunn, mat den ëffentleche Fuerschungszentren, mat der Universitéit, wou déi Budgete jo och higin a wou déi, mengen ech, och op eng ganz kompetent Aart a Weis verschafft ginn.

Mä natierlech muss d'Politik d'Méiglechkeet hunn, de Suivi ze maachen, den Iwwerbléck ze halen, ze garantéieren, datt de politesche Willen herno nach ëmmer och ëmgesat gëtt. An dofir ass dat doten eng Fro, déi effektiv ka gestallt ginn, ob mer do bis ewell eis déi Moyene ginn hunn, fir dat ëmmer ze errechen.

De Regierungsprogramm gëtt och eng Rei vun Indikatiounen dorobber. De Regierungsprogramm schwätzt vill vun der Gouvernance vum eiser Fuerschungslandschaft am grouse Ganzen. E schwätzt awer och vum Dialog, Dialog tëschent der Politik an den Acteuren an der Fuerschung, fir och do nach ze kucken: Wou kënne mer eis vläicht méi staark nach d'Wuert ginn, fir an eng gewësse Richtung ze goen? A wéi kann d'Politik de Fuerscher an de Fuerschungsacteuren, den Instituter vläicht soen, wat d'Politik och denkt, wat wichteg wär ze maachen? A wéi kënnen déi Acteuren awer och der Politik soen, wou vläicht dat eent oder dat anert Rad nach eng Kéier méi staark misst gedréit ginn an eng gewësse Richtung, fir datt et dann awer méi einfach gëtt, fir um Terrain den Ziler e Stéck wäit méi no ze kommen.

Et ass eng Fro gestallt ginn iwwert de Max-Planck-Institut. Do hätt een och iwwer aner Instituter kënne schwätzen. Mä dat weist eigentlech, wéi wéineg datt mer wëssen hei am

Land, wat an deenen Instituter heiansdo geschitt. Ech war mam André Bauler de Max-Planck-Institut kucken. Dat ass impressionnant. Do si brillant jonk Leit aus ganz Europa, déi do hir Dokteraarbecht schreiwen. An ech mengen, datt dat engem Land wéi Lëtzebuerg gutt zu Gesiicht steet.

Am Laf vum deene leschte Méint ass ëmmer erëm gesot ginn, mir géifen ze wéineg Efforte maachen als Lëtzeburger Land am Beräich vum Héichschoulwiesen, well mir e bëssen op d'Käschte vum deenen anere géife liewen, well mer eis Studenten alleguer an d'Ausland schécken.

Ech denken, datt dat heiten e Bäitrag ass, wou mer och jonke Leit soen: Kommt op Lëtzebuerg. A mir ginn e Stéck dovunner zrëck, an et ass eppes, wat bei eis passt. Déi kucken zur Fënster eraus, da kucke se op den Europäesche Gerichtshaff. An déi wäeren net op Lëtzebuerg an net op déi dote Plaz komm, wann den Europäesche Gerichtshaff net do wär. An ech mengen, datt dat och eng Fro vu Siège vum esou Institutione ka méi einfach maachen. Ech denken un déi vill Affekotenétuden, déi mer hei zu Lëtzebuerg hunn, déi sécherlech net oninteresséiert sinn, och Fuerschungsaktivitéit ronderëm sech ze hunn an eng Proximitéit zur Fuerschung an deem doten Domän ze hunn.

Ech denken och, datt déi jonk Leit, déi do erausginn, sécherlech net herno alleguete wäerten hei zu Lëtzebuerg weider fuerschen oder soss iergendzwoosch hiert Brout verdénge. Mä ech kann lech awer soen, wa se iergendzwoosch an enger Brësseler Administratioun herno eng Kéier sëtzen a se wëssen, wat Lëtzebuerg ass a wien hinne och vläicht gehollef huet, hiren Doktertittel hei ze kréien, datt dat net onbedéngt zum Nodeel vum eise Land wäert sinn. Ech mengen, datt mer do ganz differenziéiert dann och mussen drun erugeen. A fir d'Alleréischt musse mer awer kucken, wat da wierklech do geschitt, ier mer et kënne bewäerten.

D'Onofhängegkeet vum der Fuerschung ass och vum Här Kartheiser ugeschwat ginn. Jo, mir mengen alleguerten, datt mer onofhängeg Instituter brauchen, well mer mengen, datt d'Fuersche selwer als handelnden Acteur näischt dierf sinn, wou d'Politik ze bestëmmen huet, wat ee mécht a wat een net dierf maachen, an deene Grenzen, déi mer an engem Rechtsstat awer dann duerch en demokratesche Prozess musse kënne setzen.

Ech denken och, datt dat extrem wichteg ass, wa mer wellen eescht geholl ginn dobaussen an eiser Fuerschungsaktivitéit, datt mer dann eisen Instituter eng Onofhängegkeet kënnen zougustoen, well dat ee vum deene wichtigste Kritären ass, wann et drëms geet, fir ze decidéieren, ob e Standuert da wierklech à même ass, d'Qualitéit ze errechen oder net.

Ech denken awer och, datt déi Onofhängegkeet muss ëmmer gesi ginn an engem Kontext an datt och e Fuerschungsinstitut, wann e sech orientéiert, dat net nëmmen no banne ka maachen, mä och no bausse muss maachen, fir datt en awer gesäit, a wat fir enger Gesellschaft

datt en existéiert. An ech wëll do emol net nëmmen dovunner schwätzen, vu wem ee säi Geld kritt, mä awer och dovunner, wat fir een Auftrag datt een huet, fir fir déi Gesellschaft och do ze schaffen an eppes Positives ze bewierken.

Dofir ass et wichteg, datt déi Acteuren awer och - bei aller Sympathie fir d'Iddi vum der Onofhängegkeet, an déi brauche mer - bereet sinn, driwwer nozedenken, wat fir eng Roll datt si och an engem kleng Land wéi Lëtzebuerg heiansdo ze spillen hunn.

Dann zur Fro vun de Quoten...

► **M. le Président.** - Här Minister, ech wëll lech just drop opmierksam maachen, dass lech Är Zäit fortgelaft ass.

► **M. Claude Meisch, Ministre de l'Enseignement supérieur et de la Recherche.** - Dir kënnt lech virstellen, wann ech lech soen, datt déi Quot, déi hei agefouert gëtt, wann dat dee leschte Punkt ass, deen ech nach wëll dévopéieren, datt ech mech do zimlech kuerzfaasse wëll, vu de Passé vu menger Partei, deen den Här Kartheiser jo hei - net zu Onrecht d'ailleurs, well alles, wat en hei virgedroen huet, dat stëmmt - dévoppéiert huet.

Et ass, wéi ech de Mëtteg héieren hunn, dat éischt Gesetz, an deem dann eng Geschlechterquot definéiert gëtt. Et war eng virgesinn am éischte Projet, dee schonn 2012 déposéiert ginn ass, vun 30%. D'Regierung huet generell gesot, datt mer op 40% wëllen eropgoen, virun allem emol bei deenen ëffentlechen Instituter a bei deenen ëffentleche Conseils d'administration, op déi d'Regierung selwer en Afloss huet.

Ier een emol iwwerhaupt driwwer diskutéiert nämlech, ob a private Gesellschaften an de Conseils d'administration esou eng Quot misst agefouert ginn, mengen ech, musse mer als Politik awer selwer eis Responsabilitéit iwwerhuelen an do emol kucken, datt mer zu engem besseren Équilibre bei den Décisioungsgremien tëschent Männer a Frae kommen. Dat ass dat, wat am Regierungsprogramm steet. Dat ass dat, wat mer och hei an dësem Gesetz maachen. A well am éischte Gesetz eng Quot drastoung, hu mer dunn och gesot: Ma da kommt, da setze mer se direkt esou fest, wéi de Regierungsprogramm dat dote festleet a proposéiert.

An dofir si mer eben och net op déi Recommandatioun agaangen, fir e generell Quotegesetz ze maachen, well ech awer och mengen, datt et herno secteur par secteur och nach eng Kéier muss gekuckt ginn, net well ech zweifelen un deene 40%, mä well een awer muss kucken, wéi schnell a wou an op wéi eng Aart a Weis ee se soll kënnen ëmsetzen. Hei denken ech, datt ee se kann ëmsetzen, datt ee se och muss ëmsetzen an datt een och kompetent Männer a Frae fënnt. Well mir hu jo net gesot, datt et nëmme Frae musse sinn. Mir hunn hei vum „sexe sous-représenté“ geschwat, deen op 40% awer soll représentéiert, minimal représentéiert sinn.

Ech denken, datt et absolut méiglech ass, och hei am Land an och aus dem Ausland - well et sollen net nëmme Leit hei aus dem Land sinn - Leit ze motivéieren, an déi Conseils d'administration do ze kommen. A wann dat mir elo de Ruff als gréisste Feminist sollt abréngen, well ech deen Éischte sinn, deen hei esou e Gesetz dann däerf verteidegen, da kann ech domadder och nach ganz gutt liewen. Vläch sinn ech souguer iergendzwoosch e bëssen houfreg drop.

Merci.

► **Plusieurs voix.** - Très bien!

► **M. le Président.** - Merci och dem Här Minister.

Mir sinn domat um Enn vun den Diskussiounen ukomm a mir géifen zur Ofstëmmung iwwert de Projet de loi 6420 iwwergoen.

Vote sur l'ensemble du projet de loi 6420 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. D'Procuratiounen. De Vote ass ofgeschloss.

59 Deputéiert hunn um Vote deelgeholl a 56-mol gouf mat Jo gestëmmt, bei 3 Abstenttiounen, wou ech dovun ausginn, dass déi genuch motivéiert sinn.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Luc Frieden, Léon Gloden (par M. Laurent Mosar), Jean-Marie Halsdorf, Mmes Martine Hansen, Françoise Hetto-Gaasch, MM. Jean-Claude Juncker (par Mme Nancy Arendt), Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler et Michel Wolter;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur (par M. André Bauler), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps et Edy Mertens;

MM. Claude Adam, Henri Kox, Mmes Josée Lorsché, Viviane Loschetter, M. Roberto Traversini et Mme Christiane Wickler;

MM. Justin Turpel et Serge Urbany.

Se sont abstenus: MM. Gast Gibéryen, Fernand Kartheiser et Roy Reding (par M. Fernand Kartheiser).

Ass d'Chamber dann och bereet, fir d'Dispens vum zweete verfassungsméisge Vote ze ginn?

(Assentiment)

Da soen ech lech Merci.

Domat si mer um Enn vun eiser Sëtzung vum haut ukomm. Rendez-vous muer de Mëtteg um zwou Auer. Merci!

(Fin de la séance publique à 17.15 heures)

- Retrouvez vos députés, tous les textes législatifs et documents parlementaires, les émissions «Chamber aktuell» et les vidéos des séances publiques sur **www.chd.lu**.
- La Chambre et les jeunes: si tu as entre 12 et 25 ans, consulte nos pages 'Junior' sur **www.chd.lu**, avec quiz, information et vidéo.

- L'actualité parlementaire vous intéresse? Consultez le site de la Chambre **www.chd.lu**.

- Comment est créée la loi? Toutes les explications en texte et en images, sur **www.chd.lu**.

- De la première assemblée parlementaire de 1841 à la Chambre des Députés d'aujourd'hui: retrouvez l'histoire parlementaire sur les pages «organisation et fonctionnement» de la Chambre des Députés.

www.chd.lu

www.chd.lu